

筆記小說大觀

★集

玉芝堂談薈

明徐應秋輯

第九冊

進步書局校印

玉芝堂談會卷十九

姑蔑徐應秋君義父輯

經星名數

余讀星官家言稱太微宮垣五十星在翼軫之北一曰天庭一曰保舍五帝之座十二諸侯之府其外蕃九卿也西蕃四星南北列南端門第一星為上將北間為太陽西門門北一星為次將北間中為西華門門北一星為次相北間為太陰西門北端一星為上相東蕃四星亦南北列南端第一星為上相北間為太陽東門門北一星為次相北間中為東華門門北一星為次將北間為太陰東門北端一星為上將其南蕃兩星東西列西星為右執法御史大夫之象東星為左執法院尉之象兩執之間太微天庭端門也右執法西間為右掖門左執法東間為左掖門紫微垣十五星東西列于衛北極為藩屏之臣東蕃八星西蕃七星在北斗之北太乙之常居土官也一曰長垣一曰天營一曰旗星其南西蕃兩星之間為閭闔門東蕃近閭闔門第一星為左樞第二星為上宰第三星為少宰第四星為上輔第五星為少輔第六星為上衛第七星為少衛第八星為少丞西蕃近閭闔門第一星為右樞第二星為

少尉第三星為上輔第四星為少輔第五星為上衛第六星為少衛第七星為少丞
天市垣二十二星在房星東北一曰天府一曰長城天子之市也石氏曰天市垣
主四方邊國左一星宋也次衛次燕次東海次徐次太山次齊次河中次九河次趙
次魏次中山次河間門右一星韓也次楚次梁次巴次蜀次秦次周次晉次鄭北
極五星在紫微宮中一曰天極一曰北辰天之最尊星也其第一星主月太子也第
二星主日帝王也一曰太乙之座其最明而赤者也第三星主五行庶子也第四星
後宮也第五星天極也四輔四星抱北極之樞所以輔佐北極而出度授政天
乙一星在紫微闔闔門中六星之南主天道又主戰鬪鈎陳六星在紫微宮中華
蓋之下六星為六軍一曰鈎陳為法官大帝之正妃故為萬物之母而象六宮之位
其端大星為元妃餘星承之為庶妾天皇大帝一星在鈎陳口中其神曰曜魄寶
主命德以後天子陰德二星在紫微宮內尚書之西主圜給之郵行德施惠尚
書五星在紫微垣門在東南維八座大臣之象女史一星在柱史北婦官之微者
主傳漏記御女四星在紫微宮中內鈎陳之北八十一御女之氣也一曰御史官
主禮儀侍帝宴寢天柱五星在紫微宮中華蓋北左傍近東垣北隅主建政教懸

法禁。天理二星在紫微宮內。垣門之左近陰陰平獄之官也。六甲六星在紫微

宮內。華蓋扛傍。主分陰陽紀節候。所以布政授時。華蓋九星扛七星。共十六星在

勾陳上。所以覆蔽大帝之座。傳舍九星在紫微宮外。華蓋上近河賓客之館舍也。

內階六星在紫微宮外。文昌之北。天子之階也。天厨六星在紫微宮垣東北維

天子口官之厨也。天床六星在紫微闔闔門外。天子解息燕休之所也。內厨二

星在紫微垣外。西南角后夫人太子飲食之厨也。北斗七星在紫微垣外。太微垣

外。太微垣北七政之樞機。陰陽之本原也。輔一星輔于開陽之傍。所以佐斗成功

也。天理四星在北斗魁中。執法之官。決獄之職。貴人之宰也。相十一星在北斗

南。天子丞相也。太陽守一星在天相西。大將大臣之象。所以守衛天子之宮。戒不

虞。勢四星在太陽守西北。刑餘之人也。三公三星在北斗魁西。杓東亦曰三師。

天子之輔臣也。文昌六星在紫微垣外。北斗魁前如筐形。天之六府也。第一星為

上將。主建威武。二星曰次將。主正左右。次三星曰貴相。主理文緒。次四星曰司命。主

賞功進德。次五星曰司中。主司過詰咎。次六星曰司祿。主佐理大寶。天牢六星在

北斗魁下。貴人之宰也。三台六星兩兩而居。一曰二能。一曰三衡。一曰天柱。一曰

三奇。一曰天階。一曰泰階。三公之位也。上階上星為天子。下星為女主。中階上星為諸侯。三公。下星為卿大夫。下階上星為士。下星為庶民。天棓五星在紫微垣外。女床東北。天子之先驅。所以禦難避非常也。天槍三星在北斗杓端。招搖之傍。一曰天鉞。天之武備。以守備紫宮金官也。玄戈一星在北斗杓端。招搖之北。一曰天戈。主北夷。招搖一星在梗河北。次北斗杓端。一曰常陽。一曰天庫。一曰天茅。主兵。主夷狄。梗河三星在大角北。主矛鋒。以備天子不虞。一曰天盾。一曰天鋒。天之劍戟。主誅罰。七公七星在招搖東。橫列貫索之口。天之輔相。主執法。別善惡之官。貫索九星在天公垣外。七公之前。一曰連索。一曰連營。一曰天闈。亦謂之天牢。賤人之牢也。天紀九星在貫索北。東九卿也。又為九河也。一曰天緯。主紀萬事。理冤訟。女床三星在天紀北。後宮女御也。扶筐七星在紫微宮。主藏蓋。鈎星九星。一曰天鈎。在紫微垣東藩之外。傳舍之東。造父之北。主輿服。帝座一星在天市垣中。候星之西。天庭也。帝座有五。一在北極。一在微宮。一在太微。一在天市。一在大角。一在心中。央。皆王者之所居。候一星在天市中。帝座東北。土官也。主候陰陽。司遠國夷狄。以知謀為。宦者四星在帝座西南。傍之奄人也。宗正二星在天市中。帝座東南。宗

正大夫之象也。宗人四星。在宗正東。主恩享。宗正小宗之象也。宗星二星。在宗

人東北。候星之東。主先人祠享。主親踈宗族之象也。帛度二星。在天市中。宗星東

北。主度量平貨交易。屠肆二星。在帛度東北。主屠宰。列肆二星。在斛星西北。主

市貨。斗五星。在天市中。宦者西南。主平量。斛四星。在市樓北。斗星南。亦曰天斛。

主度量。車肆二星。在天市中。南門內。主車駕。市樓六星。在天市門中。臨箕星之

上。天子之市府也。五帝座五星。在太微宮中。其中星為黃帝座。黃帝含樞紐之神也。

東一星。為青帝靈威仰。南一星。為赤帝赤熛怒。西一星。為白帝招拒。北一星。為黑帝

叶光紀。五帝座者。天子之位也。謂者一星。在太微宮中。左執法之東。主贊賓客。辨

疑惑。三公三星。在太微宮中。謂者東北三公之內座。朝會所居也。九卿三星。在

太微宮中。三公之北。九卿朝會之內座也。諸侯五星。在太微宮中。九卿之西。天子

畿內之諸侯也。屏四星。在太微間中。五帝座南。近右執法。所以擁蔽帝庭也。幸

臣一星。在帝座東北。太子之侍臣也。太子一星。在幸臣西。帝座北。天子之儲貳也。

從官一星。在太子西北。傳從之臣也。郎將一星。在郎位東北。武衛之官也。虎

賁一星。在太微西。藩之外。上相之西。下台之南。旄頭之騎官也。主宿衛侍從。常陳

七星如畢狀。在郎位北。天子之宿衛也。主備強禦。郎位十五星。依烏然。在太微帝座之北。周官元士。漢光祿中散諫議郎。三署郎中。是其職也。明堂三星。在太微垣外。西南陬。天子布政之官也。靈臺三星。在明堂西。主觀雲物。察機祥。候災變。少微四星。在太微西北。列士大夫之位也。第一星為處士。第二星為議士。第三星為博士。第四星為大夫。長垣四星。在少微南。西北列。主邊界城邑。及胡夷疆城。攝提六星。在亢北。直斗柄之南。一曰環樞。一曰天樞。一曰闕兵。一曰執法。一曰三老。一曰天鉞。一曰天盾。一曰天武。一曰天兵。主建時節。伺機祥。所以夾輔帝座也。大角一星。在攝提間。一曰天棟。一曰天旂。為天子之座。平道二星。在左右角間。天子中國。八達之衢也。主道路。進賢一星。在平道西。太微垣東。主舉逸搜賢。天田二星。在右角北。天子畿內躬耕。以供祭祀之藉田也。天門二星。在左角西。平星之北。天子待朝會賓客之所也。平星二星。在左角南。庫樓北。大理卿位。主平獄訟。庫樓十星。在角南。其大六星為庫。內四星為樓。一曰天庫。是謂兵車之府庫。中十五星。二三而聚者。扛也。中央四小星。衡也。南門二星。在庫樓南。天之外門也。主守兵。周鼎三星。在攝提西南。國之神器也。帝席三星。在大角北。天子燕樂獻酬之

所也。亢池六星。在亢北。主沆舟迎送度水之事。折咸七星。在亢南。天子執法之

官。頓頑二星。在折咸東南。獄官也。陽門二星。在庫樓東北。主邊塞險要。天乳

一星。在氐北。主雨露。騎官二十七星。在氐南。天子宿衛騎士。陣車三星。在氐南

革車之象。車騎三星。在車官南。為車馬之將。騎陣一星。在騎官東南。端騎將也。

天輻二星。在房西。騎陣之東。主鑿駕。積卒十二星。在房星西南。一曰衛士。所以

守衛明堂。掃除不祥。鈞鈴二星。在房東。近右股。在驂兩星之間。天子之腹。心喉舌

也。鏡閉一星。在房東北。主管齋開閉之官。罰三星。在東咸正西南。北列。主誅罰

東咸四星。西咸四星。皆在房心之北。日月五星之道。為帝側之屏。以表障後宮。

日一星。在房中道前。太陽之精也。從官二星。在積卒西北。房宿西南。主天子疾病巫

醫。天江四星。在尾北。主太陰。傅說一星。在尾後。主祝章。為後宮祈神明。保子孫

元命也。魚一星。在尾後河中。一曰據星。一曰蒙星。主知雲雨之期。龜五星。在尾

南。漢中。一曰連珠。主贊神明。定吉凶。杵三星。在箕南。木官也。主春杵之用。據一

星。在箕口前。主簸揚。給犬豕。建六星。在南斗背。下臨黃道。一曰天旗。一曰天關。為

天之都官。七政所起。律歷之本原也。天弁九星。在建星北。入河中。市官之長也。

鰲十四星在南斗南。主水族。天鷄二星在狗國北。主候時。狗國四星在建星東。主三韓鮮卑烏桓獫狁之屬。狗二星在南斗魁前。主守禦。天淵十星在鰲東南。一曰天海。一曰太陰。主灌溉。天籥八星在南斗杓西。主鎖鑰關閉。農丈人一星在南斗西南。箕星之東。老農也。主稼穡。天田九星在牛宿東南。天子畿內田也。其占與角北天田同。九坎九星在天田南。水官也。主水旱之事。羅堰三星在牛宿東。主提塘以畜水灌溉。天桴四星在左旗南端。南北列天之桴鼓也。主刻漏。河鼓三星在牽牛北。一曰天鼓。一曰三武。一曰三將。中星大將軍。南星左將軍。北星右將軍。主軍鼓。左旗九星在河鼓左。右旗九星在河鼓右。河鼓之旗也。主設備。知敵謀。織女三星在天市垣東。一曰東橋。一曰天女。天地之女也。主綉緯布帛絲線之事。漸臺四星在織女東。主畧漏律呂之事。輦道五星在織女西。足天子嬉遊之道也。天津九星在女虛之北。橫河中。一曰天潢。一曰潢中。一曰江星。一曰水王柱。一曰格星。一曰橫星。一曰天漢。主河梁。以度百神通四方。十二國合十有六星。在牛女之南。近居坎。分土而居。列國象也。齊一星在九坎東。齊北二星。趙趙北一星。鄭鄭北一星。越越東二星。周周東二星。南北列為秦秦南二星。代代西一星。晉晉

西一星韓。韓北一星魏。魏西一星楚。楚南一星燕。敗白四星在北落師門之南。主

凶災。璃珠五星在須女北。主后宮之藏。后夫人環珮之飾。匏瓜五星在璃珠北。

一曰天鷄。一曰天匏。主后宮。主司中以和五味。敗瓜五星在匏瓜南。主瓜果。奚

仲四星在天津北。天子之車正也。司命二星在虛北。主舉過罰。除不祥。司祿二

星在司命北。主爵祿。增年延德。司危二星在司祿北。主矯失以正下。司非二星

在司危北。主伺察內外過失。人五星在庫府東。主萬民。杵三星在人東。主舂糗

車府七星在天津東。近河東。抵司非尾。指天鈞。主官車賓客之館。造父五星在

傳舍南。一曰西橋。一曰司馬。一曰百藥。河中御馬之官也。墳墓四星。綴危下。如墓

形。主山陵喪葬之事。哭二星在虛南。主號哭。天壘十有三星。形如貫索。在哭泣

置南。主北夷丁零匈奴鬼方之類。虛梁四星在危南。主國陵寢廟鬼神之神。蓋

星二星在危南。天子治宮室之官也。天錢十星在北落門西。主錢帛府庫。雷電

六星在室宿南。主興兵雷動蟄。土公二星在虛宿南。主營造起土之官。雲雨四

星在霹靂東南。主雨澤。霹靂五星在土公南。主興雷奮擊。土公吏二星在營室

西南。主設備。司過失。壘辟陣十有二星。在室壁南。橫列其中。四星在兩端。各四星

四方羽林軍壘也。主天子軍營。羽林天軍四十五星。三三而居。散在壘辟之南。一曰材官。一曰天南庫。一曰單于軍。主守衛天子之官。鈇鉞三星。亦曰口鑽。在羽林西。主斬殺。鈇鑽五星。在羽林東。天倉西門。刈具也。北落師門一星。在羽林軍西南。天軍之門也。主候非常。八魁九星。在北落東南。主設機穽。張禽獸之官。天綱一星。在北落西南。天子弋獵之所。騰蛇二十二星。在室北。一曰天蛇。主水族。天廐十星。在東壁北。狀如大錢。天馬之廐也。王良五星。在奎北河中。一曰天津。一曰王濟。漢中四星。謂之天驛。旁一星曰王良。天子奉車度水之官也。附路一星。在閣道南旁。別道也。一曰伯樂。太僕之象。閣道六星。在王良前。天子僕也。主執御。天大將軍十有一星。在婁北。天之師帥。中大星。大將也。其餘小星。吏士也。軍南門一星。在天大將軍西南。主誰何出入。外屏七星。在奎南。以蔽天濶。天濶七星。在外屏南。天廁也。土司空一星。在奎南。主水土之事。左更五星。在婁東。山虞也。主知山澤林藪之事。右更五星。在婁西。牧師也。主管養牧牛馬。天倉六星。在婁南。主倉庫之藏。大司農之事。天庾二星。在天倉東南。主路積。為積粟之場。天廩四星。在昴南。主會計歲廩事。天囷十有三星。在胃南。主衛糧。百庫之藏。太陵八星。在胃北。

主死。葬陵墓。積尸一星在太陵中。陵墓之氣也。天船九星在太陵北河中。一曰

舟星。一曰天更。主水旱。卷舌六星在昴北。主樞機。天譏一星在卷舌口中。主巫

天阿一星在胃東。昴西。主察山林妖變。月一星在昴東。女主大臣之象。天陰

五星在畢柄西。主密謀。剪葉六星在天苑西。主積草供牛馬之食。一曰天積。天子

之藏府也。天苑十六星在昴畢南。如環狀。天子畜牧之苑。礪金石四星在五車

北。主磨礪鋒刃。五車五星三柱共九星。合十有四星在畢東北。五神之外座也。一

曰天庫。一曰天倉。其西北端。大星曰天庫。為天將軍。主秦主太白。其神名令尉。次

東星曰天獄。主燕趙。主辰星。其神風伯。次東星曰天倉。主魯衛。主歲星。其神雨師。次

東南星曰司空。主楚。主填星。其神雷公。次西南星曰御星。主韓魏。主熒惑。其神名豐

隆。天潢五星在五車中天池。一曰五潢。主津梁。咸池三星在五車中。天潢南。一

曰潢龍。一曰潢池。一曰天淵。一曰天井。主陂池。天街二星在昴畢間。黃道所經。陰

陽之所分也。街南為華。街北為夷狄。街北。昴以西也。街南。畢以東也。天關一星在

五車南。畢西北。天門也。主關塞。天節八星在畢附耳之南。使臣之所將也。諸王

六星在五車南。漢中。主屏藩王室。天高四星在諸王南。參旗西北。近畢地。主齋戒。

一曰為望氣之臺。主視氛祲。九州殊口九星在天節。南主九土。重譯殊萬異俗。一曰勾風。主聚議。參旗九星在參南。一曰天弓。一曰天旗。主弓弩之用。以候變難。九游九星在玉井西南。天子之旗也。座旗九星在司怪西北。主別君臣尊卑之位。司怪四星在井鉞前。主候天地日月星辰山川草木禽獸龍蛇之變。玉井四星在參右。主水泉給庖厨。天屏二星在玉井南。為屏風。以障廁。主疾病。天廁四星在屏東。涸池。主天下疾病。天矢一星在廁南。主候吉凶。軍井四星在玉井南。軍中之井也。主給軍饗。南河三星北河三星。分夾東井。一曰天高一曰天亭。天之闕門。主關梁。南河曰南戌。一曰南官。一曰南紀。一曰南門。一曰南闕。又為越門。北河曰北戌。一曰北宮。一曰北張。一曰陰門。一曰北闕。一曰胡門。南河戌為燿。主火。一曰南藏。北河戌為衛。主水。一曰北藏。兩戌間為天中道。天罇三星在井北。五諸侯。南主。威饘粥。以給貧病。五諸侯五星在東井北。近北河。一曰帝師。二曰帝友。三曰三公。四曰博士。五曰太師。主刺舉。戒不虞。積水一星在北河。一名聚水。主聚美水。以給天子酒官。積薪一星在積水東。聚薪以給享祀。供庖厨。水府四星在東井。主設隄防。以備水。水位四星在東井北。西南列。主水衡。以洩溢。四瀆四星在東井。

軒轅之東江流淮濟之精也。軍市十三星如錢狀在參東南天軍貨易之市。野
鷄一星在軍市中主知變怪虞伏奸。丈人二星在軍市南國之老臣也。子二星
在丈人東。孫二星在子星東皆所以傳丈人而扶持之。闕丘二星在南河東天
子之闕主象魏。天狼一星在井東南主殺掠。一曰夷將。一曰天陵主西南夷主盜
賊。弧矢九星在狼東南天矢也以備盜賊。老人一星在弧矢南曰南極老人主
壽考。天狗七星在狼北鬼宿西南橫河中以守財也。天禮六星在東南社神也
積五星在七星南主百穀。外尉六星在柳南祭祀燕享之尉。天紀一星在外
厨南主知禽獸齒歲。燿四星在軒轅西亦曰烽燿主烽火備警急。酒旗三星在
軒轅右角南酒官之旗也主燕享飲食。軒轅十有七星在七星北黃龍之體。一曰
煉陵。一曰燿星。一曰昏昌主雷雨之神。震為雷激為電和為雨怒為風亂為霧疑為
霜散為露聚為雲淫為虹蜺離為背為分為抱為玦皆軒轅主之。內平四星在中
台之南軒轅之北執法平罪之官也。天相三星在酒旗南大臣之象主爵位。天
廟十四星在翼南主東越及貫胸越裳諸國蠻夷。軍門二星在青丘南天子六軍
之門主營候。土司空四星在軍門南主土工九域地界辨風土均職貢來遠人。

青秋七星。在軫東南。主東方三韓之國。南蠻夷貌之星。器府三十二星。在軫南樂器之舍。主音樂律呂。已上凡星名二百四十有一。為星一千一百八十。此皆在二十八宿之外者。張衡靈憲。史記天官。諸書不能悉舉其名。因備錄之。

陳眉公曰。三垣二十八宿中。外宮計二百八十三座。一千五百六十五星。張衡靈憲。中外之官。常明百二十有四。可名者三百二十。為星二千五百微星之數。蓋萬一千五百二十。

五星順逆

古曆五星並順行。秦曆始有金火之逆。甘石同時。自又差異。漢初測候。乃知五星皆有逆行。其後相承。罕能察識。北魏末。清河張子信避亂隱于海島。積三十餘年。專以渾儀測候。日月五星。始悟日月交通。有表裏疾徐。五星見伏。有感召向背。言日行在春分後則徐。秋分後則疾。合朔月在日道裏則日食。在日道外。則雖交不食。月望值交則食。不問表裏。月行遇水火土金四星。向之則速。背之則遲。李淳風曰。歲星熒惑填星。晨見于日後。行遲于日。當午平旦之時。故之午上便留。留而平旦過。反則逆行。至于夕時。又有當午上則更留。留而過午。則又順行。行極而伏。與日合。則當宿共度。

而受命于日。更晨見于東方。此皆不敢以昏旦之時當午也。至于金水二星。則又甚焉。晨見東方。平旦當丙巳之地。便速行以追日。及之而伏。伏與日合。復出于西方。速行昏昧。至未丁之地。即速行待日。而又伏焉。則五星者不敢昏旦當午而見也。凡五星東行為順。西行為逆。趨舍而前為贏。退舍而後曰縮。一曰失次而上。二三宿曰贏。躁急之象也。失次而下。二三宿曰縮。退怯之象也。光色潤澤溫和曰嘉。順慶之象也。光芒奮發威猛曰怒。暴鬪之象也。光體電閃明滅曰動。不安之象也。同度曰合。石氏曰。光芒相及曰合。巫咸曰。相杳曰合。荆州占曰。相去一尺內曰合。同宿曰駢。亦謂之會。一曰光相遠曰會。却落曰留。三日曰會。未當去而去之曰出。未當來而來曰入。行而造其中曰入。入宿度而居之曰舍。石氏曰。留二十日以上曰宿。處其所曰居。甘氏曰。行所當行。過二十日不失次曰居。石氏曰。依度至而不去曰居。不西不東曰居。郝萌曰。住而不移曰留。來其旁而居曰守。石氏曰。居之不出曰守。郝萌曰。居二十日以上曰守。甘氏曰。徘徊不去其度曰守。行而侵之曰犯。石氏曰。經過其星而光耀侵之曰守。古占七寸以內曰犯。又相去雖五寸。而光芒接。為災亦輕。若相去雖一尺以外。而光氣相射。亦以犯而遂留居之曰犯守。未當入度而經入犯之曰侵。東西正當曰

冲自上而下壓之曰乘自下而上直往胃之曰陵相冲而上曰觸一日兩動相凌曰鬪直前相抵曰觸一日行而直前冲之曰觸甘氏曰合復離離復合曰鬪行而掩之曰襲行而隨后曰從從西入東出曰貫相攻曰磨周之一匝曰理理而不周曰繞迫而侵之曰薄兩體相着曰薄勾者左去右迴右去左迴如勾字之狀也己者往而復復而復往如己字之形也甘氏曰去而復還曰勾再勾為己石氏曰東西為勾南北為己郊莒曰形如勾字曰勾己字曰己速者過其傍而光射之也掩者冒而滅之也蝕者侵其邊而及其中如蚕食葉之狀也吞者上直下掩之也戴者頂之于上也同光者二體相合不辨其孰為彼孰為此也牡牝者以五星相克而論夫在陽而妻在陰是謂牝牡相承也星食月者星見月中月食星者月見而星沒也經天者昏旦出于午地木火土陽星不為忌金水陰星經天則為妖也月食五星其國皆亡又曰大臣譖死五星入月其野有逐相又曰五星食月天子殺同姓

五星列宿姓名

歲星姓蒼空名澄瀾字青凝夫人姓涇常名寶容字飛雲熒惑星姓渙空名維淳字散融夫人姓陽常名華瓶字玄羅太白星姓寒靈名振尋夫人姓明常名颺英字靈

思辰星姓肇。咍名精源夫人。姓淵常。名玄華。字龍娥。鎮星姓藏。睦名耽。延夫人姓康。常。名空瑤。字非賢。雷公江赫冲。電母秀文英。風伯方道彰。雨師陳華夫。俱見道經。酉陽雜俎云。二十八宿。昴為首。姓鞞耶尼。形如剃刀。屬火。畢姓頗羅墮。形如笠。屬木。觜姓毗梨佉耶尼。形如鹿頭。屬日。又月之子。參姓天婆斯失締。形如婦人。屬日。井姓參形如足跡。屬日。鬼姓炮波羅毗。形如佛胸。屬木。柳姓同參。形如蛇。亦屬日。星姓賓伽耶尼。形如河岸。屬火。張姓瞿雲。形同井。屬福德天。翼姓憍陳如。形同井。屬林天。軫姓迦遮延。形如人手。屬毗娑梨帝。角姓貨多羅。形同軫。屬喜樂天。亢姓迦旃延。氏姓多羅尼。二星不載。形屬房姓阿藍婆。形如瓔珞。屬慈氏天。心姓迦羅延。形如大麥。屬忉利天。尾姓遮耶尼。形如蝎尾。屬臘師天。箕姓持父迦。形如牛角。屬清淨天。牛姓莫迦。還。形如人拓石。不載。屬牛姓梵嵐摩。形如牛頭。屬梵天。女姓帝利迦。形同心。屬毗紐天。虛姓同翼。形如鳥。危姓單羅尼。形同參。不載。屬室姓閻浮都迦。屬蛇頭天。天之不載。屬壁姓陀難闍。奎姓阿瑟吒。不載。屬按此稱貝編。當是佛書耳。而藏經不載。又有祭昴用乳。畢用鹿肉。觜用果。參柳牛用醍醐。井鬼張斗用粳米和蜜。星用烏麻。翼用黑豆。軫用莠稗。角氏用菘。亢用紅豆。房用酒肉。心危用粳米。尾用果根。女用烏肉。虛用烏豆汁。室用

血奎用酪婁用大麥之說必非佛語也

北斗九星

玉樞經。北斗為帝座。上有三台。形如雙目。疊為三級。以復斗魁。是名天階。斗中復有尊帝二星。大如車輪。若人見之。壽可千歲。玄門寶海經。北斗有九星。七見二隱。其第八第九。是帝王太尊精神也。霍光有典衣奴。名還東。忽見二星在斗中。光明非常。乃拜而還。遂得增年六百。徐整長曆。北斗七星。相去九千里。其二陰星不見者。相去八千里也。北斗七星在太微。北魁四星為璇璣杓三星為玉衡。又魁第一星曰天樞。二曰璇。三曰璣。四曰權。五曰玉衡。六曰開陽。七曰瑤光。酉陽雜俎。第一名執陰。第二名執證。第三名視全。第四名拒理。第五名防許。第六曰開寶。七曰招搖。樞為天璇。為地璣。為人權。為時玉衡。為音開陽。為律瑤光。為星。又玉衡第一星主徐州。常以五子日候之。甲子日為海內。丙子日為瑯琊。戊子日為彭城。庚子日為下邳。壬子日為廣陵。凡五郡。第二星主益州。以五亥日候之。乙亥為漢中。丁亥為永昌。己亥為巴蜀。牂羊。辛亥為廣漢。癸亥日為犍為。凡七郡。第三星主冀州。以五戌日候之。甲戌為魏郡。南海。丙戌為安定。戊戌為鉅垂。河間。庚戌為清河。趙國。壬戌為常山。凡八郡。第四主荆

州以五卯日候之。乙卯為南陽。丁卯為武陵。乙卯為零陵。辛卯為桂陽。癸卯為長河。凡五郡。第五星主兗州。以五辰日候之。甲辰為東郡。陳留。丙辰為濟北。戊辰為山陽。泰山。庚辰為濟南。壬辰為東平。任城。凡八郡。第六星主揚州。以五巳日候之。乙巳為豫章。辛巳為當陽。己巳為廬江。丁巳為吳郡。會稽。癸巳為九江。凡六郡。第七星主豫州。以五午日候之。甲午為潁州。丙午為汝南。戊午為綿國。庚午為魯國。壬午為梁國。凡五郡。第一星主幽州。常以五寅日候之。甲寅為玄慈。庚寅為土谷代郡。丙寅為遼東。遼西。瀋陽。戊寅為涿郡。壬寅為□陽。凡八郡。第九星主并州。以五申日候之。甲申為五原。鴈門。丙申為朔方之中。戊申為河西。庚申為太原。定襄。壬申為上黨。凡八郡。石氏云。一星為正星。主陽德。天子之象。二曰法星。主陰星。女王之位。三曰令星。主中禍。四曰伐星。主天理。伐無道。五曰殺星。主中央。助四方。殺有罪。六曰危星。主天倉。五穀。七曰部星。亦曰應星。又曰一主天。二主地。三主火。四主水。五主土。六主木。七主金。又曰一秦也。二楚也。三梁也。四吳也。五燕也。六趙也。七齊也。又雲笈七籤。第一天樞星。則陽明星之魂神也。上總九天。上真。中監。五岳飛仙。下領後學真人。天地神靈。功過輕重。莫不隸焉。圍九百二十里。中有玉樹青實。金翅之鳥。棲宿其上。自生青精玉。

芝食之一口壽九萬年。皆水精琉璃星。有九門。有四光芒。皆爛照九億萬里。上有青城玉樓。據斗真人號曰太上宮。第二天璇星。則陰精星之魂神也。上總天宿。下領萬靈。及學仙之人。諸學道及兆民俗命祿位。莫不隸焉。圍五百五十里。中有玉樹黑實。金翅所棲。生玄芝玉飴。食之壽五萬歲。星有五門。又有四光芒。爛照九億萬里。上有五色玉樓。攀魁真人號曰中元宮。第三天璣星。則真人星之魂精也。上總九天高真。中監五岳靈仙。下領學道之人。真仙之流。莫不隸焉。圍七百七十里。中有玉樹黃實。金翅所棲。自生青精玉芝星。有十二門。門有四光芒。爛照九億萬里。中有黃臺玉樓。真人號曰真元宮。第四天權星。則玄真星之魂神也。上總九天鬼神。中領北帝三官。下監萬兆代逆不臣。諸凶勃莫不隸焉。圍八百里。中有朱臺玉樹。玉樹朱實。自生丹芝流瑛。食之壽八萬年。星有三門。門四光。炤九億萬里。上有朱臺玉樓。出斗真人號曰細幽宮。第五玉衡星。則丹元星之魂神也。上總諸天譜錄。中統鬼神部目。下領學真兆民命籍。諸天諸地。莫不總統。圍七百七十里。有黑樹白子。自生玄芝水瑛。食之壽五萬年。上有玄臺玉樓。步網真人曰紀明宮。第六開陽星。則北極星之魂靈也。上總九大真。一中統五岳飛仙。下領學者之身。凡功勤得道。輪轉階級。皆總之焉。圍七

百二十里中有赤樹白實自生金精治煉之膏食之一口得壽七萬年星有八門上有紫臺金樓躡紀真人號曰綱神宮第七瑤光星則天關星之魂太明也主天地機運如四時長養天地否泰劫運莫不隸為圍九百里中有二華之樹五色之寶生自然九味芝膏食之身生九色光得壽九萬年星有一門上有九層玉樓真龍真人號曰關會宮第八洞明星則輔星之魂精陽明也上總九天下領九地五岳四瀆神仙之官星圍九百九十里中有青華之精自有九音之字上有青鳥三足鳥生自然琉璃芝瑛食之一口得玉帝同真星有八門交通八氣上有紫氣玉樓游行三命真人號曰帝席宮第九隱元星則弼星之魂明空靈也主變化無方星圍九百九十里中有三華之樹自生九天玉章上有金口之鳳口啣金鈴中生自然七暉之曜得食暉一口與太帝同真星有九門交關九天有四光芒炤八極之外無央之中中有玉臺紫館徘徊三陽真人號曰上尊宮馬融曰七政者北斗七星各有所主第一主日第二主月第三曰命火謂熒惑也第四曰然土謂填星也第五曰代水謂辰星也第六曰危木謂歲星也第七曰剽金謂太白也日月五星各異故曰七政此說以五經星為七星之數恐未是

潑火雨

唐彥謙上巳詩。微微潑火雨。草草踏青人。白香山洛橋寒食詩。蹴毬塵不起。潑火雨新晴。毛并滿江紅詞。潑火初收。鞦韆外。輕煙莫莫。春漸遠。綠楊芳草。燕飛池閣。邈齋閑覽。河朔謂清明桃花雨曰。潑火雨。又杏花開時。正值清明謂之杏花雨。又荆楚歲時記。春曰榆莢雨。汜勝之書。三月榆莢雨。高地強土。可以種禾。夏至曰梅雨。五月雨曰隔轍雨。六月雨曰濯枝雨。七月六日雨曰洗車雨。七日雨曰洒淚雨。見歲時雜記。八月雨曰豆花雨。九月雨曰黃雀雨。見提要錄。三月三日留客雨。見陸幾要覽。四月薇香雨。見李賀集。五月分龍雨。見續博物志。又八月初三至二十三為詹天雨。立冬日液雨。見瓊碎錄。旦日雨為月額雨。見金樓子。又分別功德論。雨有三種。天及龍皆能降雨。天雨細霧下者。是龍雨。甚籠下者。是一阿修羅。共天關時。亦能降雨。籠細不定。法苑珠林。兜率天雨摩泥珠。護世城雨美膳。阿修羅雨兵仗。羅浮提世界雨清淨水。尸子。神農氏治天下。欲雨則雨。五日為行雨。旬為穀雨。旬五日為時雨。田家雜占。二月八日。張大帝生日。前後必有風雨。極準俗號云。請客風送客雨。正日謂之洗街雨。初十謂之洗厨雨。

黑氣如牛羸者必有暴雨如水牛不三日大雨如群羊奔如飛鳥五日必雨黑雲
氣如浮船者雨蒼雨氣如柳絲蔽日月五日內雨四望見青白雲名曰天塞之雲
必雨日旁有赤雲如冠珥不有大風必有大雨月始出而黑雲貫月名曰繳雲或
一或二或三或四不出三日必有大雨歲時紀事立冬後十日入液至小雪出液
此時得雨謂之液雨亦曰藥雨百虫飲此雨則蟄也楊用修以秋分後進露曰進
液非是杜詩地近漏天終歲雨注梁益之間四時多雨俗稱漏天

三素雲

唐試進士嘗以立春日望三素雲為題陶弘景水仙賦迎九玄于金闕望三素于太
清李義山送宮人入道詩九枝燈外朝金殿三素雲中侍玉皇蘇魏公帖子詞萬年
枝上看春色三素雲中望玉宸許冲元帖子詞三素雲飛依北極九農星正見南方
鮑溶溫泉詩山蒸陰火雲三素落日溫泉鷄一鳴吳筠詩瓊臺似為劫孤映大羅表
嘗有三素雲疑光自飛繞三素雲道家語也按修真八道秘言曰立春日清朝北望
有紫綠白三雲為三元君三素飛雲也春分夜半子時東北望有玄青黃雲是太微
天帝君三素雲也立夏清旦北望有紫青黃雲是太極上真君三元內宮真人三素

雲也。夏至清旦南望有赤白青雲者是扶桑大帝君三素雲也。立秋清旦正西北望有白赤紫者。是太素真人天皇白帝君三素雲也。秋分清旦南望有素赤黃雲者是南極真人上皇赤帝三素雲也。立冬清旦西南望有綠紫青雲者。是上清真人帝君皇祖三素雲也。冬至清旦正東望有朱碧黃雲者。是太霄玉妃太虛上真人三素雲也。又易通卦驗。冬至初陽雲出箕如樹。立春青陽一云少陽雲出房如積水。小寒蒼陽雲出氐大寒黑陽雲出心。雨水黃陽雲出亢驚蟄赤陽雲出翼。春分正陽雲出軫。如白鵠。清明白陽雲出奎穀雨太陽雲出張如車蓋。立夏初陰雲出甯如赤珠。一云如赤繒。小滿上陽雲出心。芒種長陽雲出斗如雄鷄。夏至少陰雲出參如水波寒露正陰雲出井如冠纓霜降太陰雲出鬼上如羊下如蟠石。又兵書。韓雲如布。趙雲如牛。秦雲如行人。魏雲如鼠。楚雲如日。宋雲如車。魯雲如馬。衛雲如犬。周雲如輪。齊雲如絳衣。越雲如龍。蜀雲如菌。呂氏春秋。山雲草莽。水雲魚鱗。旱雲烟火。雨雲水氣。孫氏瑞應圖。稍雲瑞雲。人君德至則出。若樹木稍稍然也。宋史祥符元年封泰山十月壬辰。天文院言紫雲如蓋。黃雲如龍。鳳青雲如草木。名稍雲。又散鬢雲。五行志有雲如焱。風散鬢鬢如亂髮也。象教皮編佛家有九雲。寶蓮花雲。堅固香雲。無邊色樓閣。

雲種種色妙衣雲。無邊清淨栴檀雲。妙莊嚴寶蓋雲。燒香雲。妙髮雲。清淨雲。莊嚴具雲。虞道園詩。平攬華鬢結。化為樓閣雲。又粉雲。蔣捷詞。粉雲天未起。覆車雲。京房易傳。黃雲如覆車。為大豐寶光雲。元遺山五雲山寺詩。兜綿羅界寶光雲。砲車雲。國史補。暴風之候。有砲車雲。東坡詩。終日江頭天色惡。砲車雲起風欲作。相雨書。四方北斗中無雲。惟河中有雲三枚相連如浴狶。三日大雨。四方有濯魚雲。疾者立雨。遲者雨少。吳□占候風氣秘訣。有青雲如雉兔臨城營。軍敗走。兵書曰。有雲如丹蛇。隨星後。大戰殺將。呂氏春秋雲狀有若馬。若白鵠。若衆車。有狀若人。蒼衣赤首。不動。其名曰天衝。有其狀若懸釜而赤。其名曰雲。占書。月始出而黑雲貫月。名曰繳雲。或一或二。或三。或四。不出三日。有暴雨。八節占雲。立春。其日晴明少雲。歲熟。陰則旱。虫傷禾豆。春分。東方有來雲。歲熟。立秋。有白雲及小雨。則吉。晴明物不成。秋分。白雲則善。晴明物不成。立冬。晴明小寒人君吉。天下喜。冬至。其日有雲雪寒。大豐。晴明物不成。

九光霞

十洲記。崑崙之山。景雲燭日。朱霞九光。唐詩。三素雲中迎雨駕。九光霞內宿仙壇。黃履齋詞。縹緲九霞光。裏夢香在衣裳。臙靨張掄詞。仙娥花月精神。奏鳳管。鸞絃。鬪新。

萬歲聲中。九霞杯內。長醉芳春。霞一作霞。天文志。雷電蝦蚩。亦作蝦。史記。蝦虹。又作
瑕。甘泉賦。噲清雲之流瑕。河圖曰。赤水之氣上蒸為霞。

花信風

古詩。早禾映雨初晴後。苦棟花風吹日長。又棟花開后風光好。梅子黃時雨意濃。按
花信風。凡二十四番。陰陽寒暖各隨其時。但先期一日。有風雨微寒者是。呂氏春秋
稱春之德。風風不信。則花不成是也。梁元帝纂要。花信曰。鶯兒。木蘭。李花。楊花。檉花。
桐花。金櫻。黃芳。棟花。荷花。檳榔。蔓羅。菱花。木槿。桂花。蘆花。蘭花。琴花。桃花。枇杷。梅花。
水仙。山茶。瑞香。然難以配四時。蓋通一歲言也。荆楚歲時記。小寒三信。梅花。山茶。水
仙。大寒三信。瑞香。蘭花。山礬。立春三信。迎春。櫻桃。望春。雨水三信。菜花。杏花。李花。鶯
蟄三信。桃花。棠棣。薔薇。春分三信。海棠。梨花。木蘭。清明三信。桐花。麥花。柳花。穀雨三
信。牡丹。荼蘼。楝花。此後立夏矣。徐師川詩。一百五日寒食雨。二十四番花信風。崔德
符詩。清明烟火尚闌珊。花信風來第幾番。晏元獻詩。春寒欲盡復未盡。二十四番花
信風。此用花信風也。尹遷詩。曉雨催花信。春衣汗酒痕。張澤詩。春容將變臘。暖信已
驚花。則但言花信而不言風。蔣竹山詞。春晴也好。春陰也好。着些兒春雨。越好。春雨

如絲。綉出花枝紅。鳥怎禁他。孟婆合皂。梅花風小。杏花風小。海棠風。薰的寒峭。歲歲春光被二十四風吹老。棟花風爾且慢到。又元人榆筴雨。酣新水滑。棟花風軟。薄寒收。正用荆楚歲時記耳。又三月有鳥信風。五月有麥信風。見國史補。河朔春時。疾風數日。一作三日乃止。曰吹花擘柳風。見遯齋閑覽。南中六月。則有東南長風。號黃雀風。見風土記。梅雨初過。清風至。彌旬。各船解風。見嶺南錄。東坡詩。三時已斷黃梅雨。萬里初來船解風。九月鯉魚風。見提要錄。李賀詩。門前流水江陵道。鯉魚風起芙蓉老。羅鄂詞。九月江南秋色黃。雀雨鯉魚風。李商隱燕臺詞。後溪暗起鯉魚風。船旗閃斷芙蓉幹。古詞。瑞霞成綺。映船解鯉魚風起。八月葡萄風。見金樓子。又起世經難陀苑中。有三種風輪。曰開曰淨曰吹。開者有風輪來開諸門。淨者有風輪來掃除其地。令皆清淨。吹者有風輪來吹花樹。今花布散。番禺雜記。颶風將發。有微風細雨。先緩后急。謂之鍊風。前蜀王衍咸寧元年十月。幸秦州。大風發屋拔木。太史曰。此貪狼風也。當有敗軍殺將者。兵書云。風從震來。名嬰兒風。諺云。春寒多雨水。元宵前後。必有料峭之風。謂之元宵風。上行曰扶搖風。曲上曰羊角風。見莊子。凡風和暢清悅。溫涼適時。塵埃不起。人情恬澹。是謂祥風。天色皆冥。雲氣昏濁。風聲寒慘。埃溢蓬勃。是謂

怒風。風勢錯雜交亂。乍起乍止。深藏難測。其聲聒耳。是謂小人魅惑之風。風勢暴起。南北不定。離合氛埃。是謂上下不寧之風。風勢冥冥白日陰慘。黃霧四合。是謂正化未明之風。風勢悽悽。南北離合。上下蓬勃。是謂大兵將至之風。風勢凜冽。人懷戰慄。是謂刑罰慘刻之風。風聲啾啾慘切。令人悲憤。為大喪之風。風聲歛歛。如火奔馳。乍起乍息。為旱火之風。連風晦暝。至四五日。人皆悲傷。為大水殺人之風。又宮風。聲如牛鳴。客中。隆隆如雷鼓之响。微風。聲如奔馬。如炎火。如縛羸駭走羽。聲如擊溼鼓。如麋鹿鳴子。如激水揚波。商風。聲如離群羊。如扣鐘磬。如蜚羽之集。如嗚咽流水。鳴聲。惑人。角風。聲如千人語。垠垠然。令人悲哀。啾啾如人。叫笑如呼。如雉登木。俱見占書。

十二風

立春艮兌巽。春分震坤乾。風去地尺餘。擺樹枝。小有聲。不動塵。黃白雲滿天。天氣晴明。是謂景風。應木之氣。則節令調和。忠臣在位。萬物多成熟。歲美國安。若夾小雨。則百葉實。立夏巽兌艮。夏至離兌乾。風去地尺餘。擺樹枝。小有聲。不動塵。天氣和暖。紫赤雲在日上下。或遍天。是謂祥風。應火之氣。則節令調和。君明臣賢。萬物阜成。民安。

國昌若風先慢后急揚沙吹塵黑氣漲天則萬物不成人多病立秋坤兌震秋分兌
巽艮風去地尺餘擺樹鳴條不動其塵蒼白雲滿天是謂和風應金之氣則時令調
和民物阜成人主壽康兵戎不興若走石吹沙先慢後急晃沉沒天氣昏冥來年春
人不安立冬乾坤震冬至坎坤巽風去地尺餘颯颯不動塵遍天白黑薄雲氣天下
和平是謂德風應水之氣則陰陽調和萬物阜成民安國昌四夷効順若走石揚沙
先慢後急日色昏冥明年麥損虫生五穀不實又十有二風風之生于十二辰者也
考之傳曰陽生于五極于九五九四十五則變矣八風各四十五日艮為條風震為
明庶風巽為清明風離為景風坤為涼風兌為閭闔風乾為不周風坎為廣莫風卦
不過八則風亦八而已言十二風者乾之風漸九月坤之風漸六月艮之風漸十二
月巽之風漸三月而四維風皆主兩月艮為條風而立春亦曰條風巽為清明而立
夏亦曰清明坤曰涼風而立秋亦曰涼風乾為不周風而立冬亦曰不周風所以為
十二風也易緯立春條風春分明庶風立夏清明風夏至景風立秋涼風秋分閭闔
風立冬不周風冬至廣莫風淮南子東北炎風東條風東南景風南巨風西南涼風
西颯風西北麗風北寒風占書乾為折風一曰衝風坎為大剛風艮為凶風震為嬰

兒風巽為弱風離為大弱風坤為陰謀風一曰諫風兌為小弱風凡八風折木發屋飛石走沙三日不雨則占

且未國在鄆善國西且未西北有流沙數百里夏日有熱風為行狼之害人以氈掩鼻口不爾必危斃

樵風

漢鄭弘少採薪得一遺箭頃之有人覓箭問弘何所欲弘識其神人也答曰常患若耶溪載籍為難願朝南風暮北風後果然世號樵風水經註鄭弘少以清節自居恆躬樵採每出入溪津嘗感神風送之村人貪藉風勢常依隨往還有淹留者相謂曰汝不欲及鄭公風耶今紹興府城東有樵風涇宋之問詩歸舟何路遠日暮便樵風秦系詩湖裏尋君去樵風送往還孟浩然詩帆得樵風送春逢穀雨晴皮日休詩海日為京信樵風送酒船胡文恭詩雨別荆臺夢風迴越水樵錢公輔詩仙客常因一箭贈樵風時到五雲間允初徵詩將尋煉藥井更逐賣樵風揚億詩花雨六時飄講席樵風十里送浮杯齊唐詩濯足樵風波振衣禹穴巔吳奎詩樵風漾歸舟飄然一

石尤風

容齋五筆。石尤風不見其義。意其為打頭逆風也。唐人好用之。如陳子昂入峽苦風云。故鄉今日友。歡會坐應同。寧知巴峽路。辛苦石尤風。戴叔倫送裴明府云。滯水連相水。千波萬浪中。知君未得去。慚愧石尤風。司空文明留盧泰卿云。知有前期在。難分此夜中。無將故人酒。不及石尤風。則以為打頭風亦無不可。如正揚所引。宋武古樂府。願作石尤風。四面斷行旅。則當是巨颺狂飈之類。若打頭風。則固有可行者矣。安得有四面斷行旅之說哉。石尤風一作石郵。李義山來風貯石郵。楊文公石郵風。緊客心愁。尤俱作郵。殊為勝也。楊用修云。石尤江中水虫名。此虫出必有惡風。猶嶺南人云。颺母。黃河人曰孟婆。一曰石尤者。石氏女嫁為尤郎婦。尤出不歸。妻憶之至死。曰吾當作大風。為天下婦人阻商旅也。故名。

屏翳

大象賦。太白降神于屏翳。注云。其精降為雨師之神。山海經。屏翳在東海中。人謂之雨師。虞喜志林。雨師屏翳。廣雅。風師謂之飛廉。雨師謂之屏翳。雲司謂之豐隆。呂氏春秋。則以為雲師。韋昭以為雷司。曹植詰咎文。又有屏翳司風之語。其說不一。相如。

大人賦召屏翳。誅風伯。刑雨師。于屏翳之外。復言雨師。注屏翳天神使也。非一神明矣。張平子思玄賦。雲師。翳以交集。章懷註亦曰。雲師屏翳也。又陸士衡詩。屏翳吐重陰。湛方生詩。屏翳寢神變。語意皆同。繹其字義。則雲師為近之。張景陽詩。飛廉應南箕。豐隆迎師屏。顏師古曰。屏翳。一曰羊號。天問。屏號起雨。何以應之。搜神記。雨師一曰屏翳。一曰號屏。一曰玄冥。

光明電王

玉樞經。東方光明電王。名阿揭多。南方光明電王。名阿鞞嚕。西方光明電王。名主多光。北方光明電王。名蘇多未尼。善男信女。聞是名字。及知方處者。遠離一切雷電。怖畏災橫之事。又道經載。雷公江赫冲。電母秀文英。風伯方道彰。雨師陳華夫。起世經。東方有電。名曰無厚。南方有電。名曰順流。西方有電。名曰墮光明。北方有電。名曰百生樹。無厚與墮光明相觸。相對順流與百生相觸。相對故虛空雲聚之中。出生大明。名曰電光。仙傳拾遺。木公與玉女投壺。設不入者。天為之嚙。虛開光流。光今電是也。

紫露

呂氏春秋。揭雲紫露。其色紫。洞冥記。吉雲國有五色露。東方朔得玄黃青露。盛之琉

璃器以授帝。又畢勒國人長三寸，常群飛日下，自曝身熱乃歸。飲丹露為漿，拾遺記崑崙山有朱露，望之色如丹，著木石，潏然如朱雪，灑焉。又善語國人飲丹露，蓬萊山東有讎夷國，時有金霧，廣延國嘗雨青雪，霜色紺碧。元至元十八年丹陽雨紅霧，二十三年湖廣雨黑雪，宋朝雜事。太康七年河陰雨赤雪，唐五行志貞元二十一年正月丙戌京師雨赤雪，又炎帝時有香露，常奉真相潭記，驚管山霜可染紫白，庶潭露能染紅為天下冠，恨人無知者。禮斗威儀曰：君治政則軒轅之精散為甘露，列星圖天乳一星在氐北，主甘露，明潤則甘露降，瑞應圖王者敬及耆老則竹葦受甘露，拾遺記穆王東至大嶽之谷，西王母來進崦州甜雪，崦州去玉門三千里，地寒多雪，着草木皆融而甘，春秋緯文露沉武露布，又南史梁簡文時口陽雨黃雪，正德七年二月廬州雨紅雪。

平山香雨

宋之問寶葉交香雨，金河吐細泉。李賀依微香雨清，氤氳元微之雨香，雲淡覺微和。張仲山詞碧雲香雨小樓空，春光已到消魂處。羅隱巫山曲下，厭重泉上千仞香雲。結夢西風緊，或謂雨與雲，何得云香。愚謂蕭招遇洛神後逢雨，認得香氣曰：此從巫

山來梵僧不空祈雨焚白檀香龍上令左右掬庭水嗅之果有檀香氣此亦香雨也拾遺記方大山有石色如肺燒之有烟香聞數百里烟氣升天則為香雲香雲遍潤則成香雨又瀛州時有香風冷然而起張袖受之則歷年不歇沾膚軟滑

青女霜

杜詩飛霜任青女按楞嚴經青女主霜雪之神故淮南子曰秋三月青女乃出降霜雪高誘註曰青女天神青腰玉女主天霜雪梁昭明博山香鑪賦青女司寒紅花翳景王荆公詩日高青女尚橫陳胡文恭詩青女偷飛一夜霜李商隱詩青女丁寧結夜霜楊文公詩九天青女霜添味五夜方諸月溜津皆指此也地鏡曰視古屋無人居者其上獨無霜則下有寶藏臣結私背公誅殺無罪則霜不在土殺罰不錄其上則霜見風而飛隕霜殺五穀刑罰慘酷也隕霜不殺草君威不行也霜未見日而消人君以喜怒行刑罰也霜見日而不消人君執法堅不可犯也天霜晝下刑罰妄行霜下有聲外兵來伐霜芒向下人君專以法繩下霜芒旁指君以旁言刑殺人也軍中霜芒遍刁旗槍之上師不可動

河圖括地象河精上為天漢楊泉物理論星者元氣之英也漢水之精也氣發而著精華上浮宛轉隨流名曰天河。一曰雲漢爾雅析木謂之津箕斗之間漢津也郭璞注箕龍尾斗南斗天漢之津梁劉炫云天河在箕斗二星之間箕在東方木位斗在北方水位分析水木以箕星為隔隔河須津梁以渡故謂此次為析木之津也。天河從北極分為兩頭至于南極其一經南斗過其一經東井過唐志兩漢自坤抵艮為地繩北斗自乾携巽為天網其分野與帝車相直皆五帝墟也瑣碎錄天河中黑雲主雨謂之天河作壩緯書王者德至雲漢則天河直如繩陸龜蒙有繩河扇月之語江淹文麗彩繩河映萼璿圃

霧淞

春秋成公十六年正月雨木冰木冰亦曰樹介亦曰樹稼寒盛而木冰如樹着介冑也劉歆以為上陽施不下通下陰施不上達天雨而木為之冰霧氣寒木不曲直也劉向以為冰者陰之盛而冰滯者也木者少陽貴臣卿大夫之象此人將有害則陰氣脅木木先寒故得雨而冰也或曰木介介者甲甲兵象也晉書魏文帝黃初六年正月雨木冰元帝太興三年二月辛未雨木冰穆帝永和八年正月乙巳雨木冰孝

武太元十四年十二月乙巳。雨木冰。其占不一。諺曰：樹若稼。達官怕。唐書：寧王憲疾時。京城寒甚。凝霜封樹。時學者以為春秋雨木冰。即此是亦名樹介。憲見而嘆曰：此俗所謂樹稼者也。吾其死矣。此應在貴臣也。輟耕錄：至正乙巳。汴城二月中。雨木冰。狀如樓閣。人物冠帶。鳥獸卉木。百態具備。殆非人工。高林大樹。珠葆羽幢。彌望不絕。凡五日始解。自汴至中。澗皆然。不一歲。益陷汴據之。此應在甲兵也。曾南豐集：齊地寒甚。夜霧凝于木上。日出飄滿庭階。尤為可愛。遂作詩云：園林初日淨無風。霧淞花開樹樹同。記得集英深殿裡。舞人齊挿玉瓏鬆。又香銷一榻。也逾暖。月映千門。霧淞寒。齊地以為豐年之兆。諺云：霜淞如霧淞。貧兒備飯瓮。益寒淺。則為霧淞。寒甚則為木冰。樹介。霧淞兆豐。而木冰兆凶也。李獻吉詩：大寒水雨何紛紛。曉行日臨江吐雲。益詠木冰也。今朝走白霧。南枝參差開。紫宮散花女。騎龍下瑤陵。益詠霧淞也。

雲鬪有聲

晉書：咸和元年。雲鬪如暴風雨。元至正十八年三月。大同路有雲如火。交射中天。遍地俱見火光。以物觸地。輒有火起。至夜半。空中如有兵戈相鬪之聲。元和十二年。青州一夕暴風。天地冥冥。空中有如旌旗狀。屋瓦上有蹂踐聲。占者曰：不出五年。茲地

當大殺戮震澤長語正德十三年江西有黑雲紅雲若相聞者久之分為兩城人馬
洶洶若攻城城中人應之明年寧藩叛王守仁舉兵攻之閩書嘉靖二十七年六月
有黑雲降于漳郡西郊溝水皆沸屋瓦亦飛萬曆二十五年三月同安有黑雲一片
如簸箕自縣口出城南所過屋瓦皆擗南村較耕錄至正乙未正月廿三日日入時
平江在城忽望見東南方軍聲且漸近驚走覘視無他所有但見黑雲一簇中彷彿
皆類人馬而前後火光若燈燭者莫知其算迺運由西北方而沒葑門至齊門居民
屋脊龍腰悉揭去屋內床榻屏風俱仆醋坊橋董家失白米十餘石醬一缸不知置
之何地又天鳴晉元帝太興二年八月戊戌天鳴東南有聲如風水相薄二年壬辰
天又鳴安帝隆安五年閏月癸丑天東南鳴六年九月天東南又鳴義熙元年八月
東南天鳴梁武帝大同元年六月辛巳竟天有聲如風水相薄南陳宣帝大建十一
年九月癸未夜天東南有聲如風水相薄三夜乃止十四年八月癸未夜天有聲如風水
相激乙酉夜亦如之九月夜天東北有聲如虫飛漸移西北隋文皇開皇二十年四
月乙亥天有聲如瀉水自南而北後主至德元年九月丁巳天東南有聲如虫飛唐
玄宗天寶十四載五月天鳴聲若雷貞元二十一年天西北鳴中和三年三月浙西

天鳴若轉磨無雲而雨。宋神宗熙寧元年七月戊子。西南雲間有聲鳴如風水相擊。寢周四方。主民勞。兵革歲動。六年七月丙寅丑四刻。西北方雲間有聲如磨物。主百姓勞。七月庚子丑三刻。西北天鳴。主驚憂之事。寧宗開禧元年六月壬寅。天鳴有聲。占曰。人主憂驚。百姓勞失。按京房易占曰。天有聲。人主憂。又曰。萬姓勞。厥妖天鳴。至正二十七年正月乙未夜。晉寧路天鼓鳴空中。如聞戰鬪之聲。

見天門開

俗傳人有見天門開者。中有樓臺人物衣冠往來。拜之大吉。燕馮跋嘗夜見天開。神光赫然燭于庭內。北齊高洋從世宗過遼陽山。獨見天開。自知必貴。褒光錄。狀元羊襲吉。少見天開。其內雲霞瀕洞。樓閣參差。光明下照。西樵野記。天順間。陝西臨洮府蘭縣民陳鸞。夜半獨起。仰見天門大開。上帝袞冕衣袍。端拱其中。儀從鵠立者甚衆。宮殿欄楯。眩彩奪目。又馬浩瀾及四川制置使劉雄飛。俱見天開。曲洧新聞。龐籍帥延安日。冬至中夜。見天開。天象成文。云龐籍十年為相。以仁佐天下。驗視久之。乃滅。後十年。果為相。王文正公旦幼時。見天門開。中有己姓名。則其為瑞彰彰矣。然占書。天裂見人兵起國亡。又曰。天裂下人言者善惡如其言。又曰。天裂見牛馬象。天子庶

人皆憂。又曰：天裂見光流血滂滂。漢書孝惠帝二年，天開東北，廣十餘丈，長二十餘丈。占曰：地動陰有餘，天裂陽不足，皆下感。疆將害上之變也。其時呂后臨朝，卒有兵變。晉惠帝元康二年二月，天西北大裂，是時人主昏蒙，后妃專制。太安二年八月，天中裂為二，有聲如雷者三。史臣曰：此君道虧而臣下專僭之象也。是時晉國遂亡。天下分裂。穆帝升平五年八月夜，天裂廣三四丈，有聲如雷。夜雉皆雊。是時桓溫專權，陽微陰盛。南梁武帝太清二年六月，天裂于西北，長十丈，濶二尺，光出如電，其聲如雷。十二月戊申，天西北裂，光如火，倅有候景之亂。南陳后主至德元年十二月戊午，天開自西北至東南，其內有青黃雜色，隆隆若雷聲。本朝弘治戊申，陝西天開，人馬百萬自下而入。宣德中一日未申間，天裂于西南，視之若干餘丈，時晴碧無翳，內外際畔了了可察，其中芒藻不可窮極。良久乃合。正德元年正月初一日，福建正北天裂，紅光濶二丈，長數十丈，有頃光滅，自下而上，若捲席然。隆慶三年五月，平陽府絳州奏西北天裂，自丑至寅，乃合。元姚桐壽樂郊私語曰：己亥秋月晦，余曉詣嘉禾時曉星猶在樹梢，忽西北天裂數十百丈，光焰如猛火，焰徹原野，一時村犬皆吠，宿鳥飛鳴，余諦視其裂處，蟻蟻而動，中復大明，若金融于冶者。少頃方合。操舟者謂余曰：

此天開眼也。彼不知天者至尊。裂者至變。關係豈小乎哉。

真蠟國抵占城。旁有西棚國。望見天有一竅空明。稱天門。一日天際國女媧氏之所不至也。

人頂日輪

癸辛雜志。揚州有趙都統。號趙馬兒。嘗提兵船。往援李壇于山東。于舟中見日出海門。有一人通身皆赤。眼色純碧。頂大日輪而上。日漸高。人漸小。數月所見皆然。其說可謂誕妄。按程史。宋吳曦未叛時。較獵夜歸。天宇澄霽。仰見月中一人焉。騎而垂鞭。與己惟肖。問左右所見皆符。默自念曰。我當大貴。月中人其我也。揚鞭而揖之。其人亦揚鞭。乃大喜。反謀繇此益決。真誥。尹思元。康五年正月十五夜。坐屋中。使兒視月中有異物否。兒曰。月中一人。披蓑帶鋤。今年當大水。思自視之曰。不然。月中人帶劍。伏矛。當大亂三十年。后小清耳。雲麓漫鈔。紹興三十一年七月二十一日。侵晨日出。如在水面。色淡而白。中有二人。一南一北。南者色白。北者色黑。相與上下甚速。至日中。光彩射人。以水炤之。祇見南一人。是年逆亮送死于淮南。悟黑人為亮云。鐵山圍叢談。宣和歲己亥夏。都邑大水。幾冒入城。隅高至五七尺。久之方得解。時有泗州僧。

加大士。忽見于大明堂頂雲龍之上。凝立空中。風飄飄然。吹衣為動。傍侍惠岸木叉。皆在焉。又有白衣中裏。跪于僧伽前。恭受戒諭。莫識何人也。萬眾咸覩。迨夕而沒。白衣者。疑為龍神之徒。為僧伽降伏之意。上意甚不樂。春秋文曜鈞。楚有蒼雲如霓。圍軫七重中。有荷戈之人。向軫而蹲。已上五事。此則沴氣之感。容或有之。尚書故實。表弟盧某。一日碧空明徹。見仙人乘鶴而過。別有數鶴在前。后適覩自一鶴背。遷一鶴背。亦如人換馬之狀。宋史。政和中。徽宗有事南郊。出南薰門。見雲間人物隊伍。謂天真示現。蓋方士所為也。後欽宗出南門。見金酋。實應其讖。宋楊繼翁大卿。倅湖日。七夕夜。其侍姬田氏。及伎人露坐。忽有一鶴西來。繼而有鶴千百從之。皆有仙人坐其背。如畫圖所繪者。絳霞絢粲。數刻乃沒。馮開之快雪堂漫錄。虞長孺祖母。三四十時。秋夜露坐庭中。見有三人。挨月而過。異之。急呼長孺伯母同觀。伯母出遲。僅見其二。須臾俱入月中矣。檜園隆萬間。虞山採石者。見雲一片。自西南隅至。鼓樂驟空。有畫舫數隻。蕩漾雲端。仙姝數十列。坐珠簾。坐下兩傍。持篙者。盡黃帽長鬚也。江濤之聲。渺在銀漢。幻耶真耶。

天命行雨

李靖微時獵山會暮宿一朱門夜半扣門甚急主婦謂曰今天命行雨欲煩君命蒼頭披青鬃馬取雨器乃一小瓶戒曰馬鳴即以瓶水滴馬鬃上此一滴乃地上三尺慎勿多也唐年小錄唐四州門監王忠政云開成中曾死十日却活始見一人碧衣赤幘引臂登雲曰天召汝行雨隸于左落隊各有五萬甲馬簇于雲頭俯視向下重樓深室纖細悉見異者見米粒長數尺凡兩隊一隊貯人間水一隊所貯如馬牙硝謂之乾雨皆在前風車為殿

獨異志秦并六國太白星竊織女侍兒梁玉清衛承莊逃入衛城少仙洞四十六日不出天帝怒命五岳搜捕太白歸位衛承莊逃焉梁玉清有子名休玉清謫于北斗下常春其子乃配于河伯驂乘行雨休每至少仙洞耻其母淫奔之所輒迴馭故此地少雨焉

姑蔑徐應秋君義父輯

十日並出

通論。天無二日。故于文○為日。山海經。天有十日。居于陽谷。在黑齒北。一日居上枝。九日居下枝。又云。堯時十日並出。使羿射。九日落為沃焦。淮南子。若木在建木西。末有十日。其華炤下地。近于語怪矣。然史傳中。實有此異。不一而足也。按汲冢周書。胤甲即位。有妖孽。十日並出。路史。桀末年。兩日並闕。又費昌之河上。見二日在東者爛。爛將起。在西者沉沉。彼滅。尚書考靈耀。黑帝亡。二日並出。晉陽秋。建武元年。三日並出。太興三年。五日並出。后。前秦后趙。一時並起。晉愍帝建興二年正月。三日相承出。西方而東行。后。江東改元。劉聰李雄作亂。四年三月並出。五年正月。三日並炤。各有兩珥。五色甚鮮。虹蜺彌天。而二帝北狩。五胡亂矣。唐貞觀初。突厥有五日並炤。三月連明。已而頡利成擒。突厥遂滅。唐僖宗乾符六年十一月。兩日並出而闕。是日黃巢陷江陵。周恭帝顯德七年正月。日下復有一日相掩。太祖受禪。宋景德元年十二月。日下復有一日。元和四年閏三月。日傍又有一日。樂郊私語。至正丙申三月日晡。天

有兩日相盪窗隙壁竇皆成兩圓影。至正二十五年乙巳二月日旁有一星一月。古今通占鏡曰：衆日並出，天下分裂；三日並出，諸侯爭；洪水出，宋志曰：兩日並出，天下分爭；三日並出，不過三旬，諸侯爭；衆日並出，天下分。若兩軍相當，數日並出，大戰分營以應之。又異苑：周昭王時，九月並出，其色五彩，貫紫微。漢成建始元年八月，兩月重光南梁太清二年正月，兩月相承如鈎，見西方。宋真宗天禧四年四月乙酉，有兩月同出西南方。宋志：兩月並見，其下兵起，國亂地陷水湧。如三月四月，以至數月並見，其下異姓大臣爭為破亡，有亡國。一曰：大臣爭權，一曰：后宫寵妾亂政。一曰：天下有兩主立，若相去二寸，臣滅其主。乙巳占曰：兩月並出，天下治兵，異姓大臣爭勢為害。王者宜選賢接之。月在東方，有小月承大月，小國毀大國伐之，為主凶。月在西方，或小月承大月，小國勝；或大月承小月，大國勝。日月並炤，中國有兩主立。一曰：后妃爭政，有弒逆；夷狄內侵，天下兵起。日月並炤，晝見兵起，臣逆。

日中氣如飛鵲

漢靈帝中平五年正月，日色赤黃，中有黑氣如飛鵲，數月乃銷。晉惠帝元康九年正月，日中有若飛燕者，下有廢主。永和八年，張重華在涼州，日中有三足鳥，形見分明。

五日乃止。陳文帝大嘉七年三月庚午。日無光。烏見。懷帝永嘉五年三月。日散光如血。下流所。炤見赤。日中有若飛燕者。北周宣帝大象元年二月癸未。日出將入時。其中並有烏。色大如雞卵。經四日。乃滅。乾符二年。日中有若飛燕者。占書常以月十四日夜。候月中有氣如飛鳥。其地無王者。

日赤如血

漢成帝河平元年正月壬寅。日出赤。二月癸未。日朝赤。且入。又赤。夜月赤。甲申。日出赤如血。亡光。燭地黃赤。靈帝時。日數出東方。正赤如血。無光。且入西方。去地二丈。亦如之。其占曰。事天不謹。則日月赤。是時月出入去地二三丈。皆赤如血。晉光熙元年五月壬辰。癸巳。日光四散。赤如血流。炤地皆赤。甲午。又如之。占曰。君道失明。懷帝永嘉五年三月庚申。日散光如血。下流所。炤皆赤。穆帝永和八年。張重華在涼州。日暴赤如火。宋孝武大明七年十一月。日始出四五丈。色赤如血。未沒四五丈。亦如之。至八年春。凡三度。謂之日死。后魏文成帝興安元年十一月己卯。日出赤如血。正始三年四月乙巳。日赤無光。節閔帝普泰元年三月丁卯。日月並赤。赭色。天地溷濁。煬帝大業十三年十一月辛酉。日光四散如流血。占曰。賊入宮。主以急兵身伐。又曰。臣逆。

君明年三月。煬帝見弒。唐太宗二十三年三月。日赤無光。李淳風曰。日變色。有軍急。咸亨元年二月壬子。日赤無光。癸丑。赤如赭。上元二年三月丁未。日赤如赭。永淳元年三月。日赤如赭。長安四年正月壬子。日赤如赭。景龍三年二月庚申。日色紫。赤無光。開元十四年十二月己未。日赤如赭。貞元六年正月甲子。日赤如血。元和十一年正月己卯。日紫。赤無光。寶曆元年九月甲申。日赤無光。太和九年二月辛卯。日赤如血。壬辰。亦如之。光啟四年二月己丑。日赤如血。顯德三年九月戊申。日赤如赭。占曰。宰相憂。寶元元年十二月庚申。日赤如朱。靖康元年閏十一月庚申。日赤如火。無光。主其下君亡。又景福元年五月。日色散如黃金。天復天年十月。日色散如黃金。十一月亦如之。京房易傳。辟不聞道。茲謂無厭。厭異。日赤。占書。日赤如赭。兵革滿野。一曰。將死于野。感精符。夷狄內侵。兵將用。則日紫。一曰。日初出。赤如火影。地赤。其所宿國亂。亦為有兵流血。一曰。日光四散。赤如血。所照皆赤。為急。兵有流血。一曰。賊入宮。一曰。日色變青。有兵爭。京房曰。人君不德。民背上。則日赤也。

玄覽。晝而日紫。赤。夜而月白。皆將雨也。晝而日黃。白。夜而月赤。將旱且風也。晝而日青。夜而月綠。將寒之象也。晝而日黑。夜而月青。將雨。不雨。變為雲霧。暈背虹蜺。

也

日中黑鬪

萬曆戊午五月。南京大理寺寺丞董應舉上疏曰。閏四月末。外人傳喧二十八二十九日。日中黑鬪。為變異常。五月初一日未時。臣于宅西空地。親用水盆仰照。見日旁有黑氣。作態游移上下。忽入日中。日光盪轉不定。旋為黑餅。蓋于日上。不盡黑。出日先奄奄如紫。少頃黑氣又作態復入。日光盪轉。黑蓋如前。奄奄如是者三。又變淡黃。未申以後。遂無光彩。臣稽李淳風玉曆通政所說。黑氣黑點之類。大約數端。一曰政法不明。號令不常。君德不光。日生青黑。為君若省咎補過則吉。一曰天子繼天為子。繼以祭祀為盡子道。若郊祀弗恭。天意乘怒。乃生黑氣。一曰臣挾私愛。黨進不肖。挾私怨。退忠良。傷明哲之德。民以怨之。故日有黑氣黑點。一曰黑日與日對或合。胡狄來華。一曰日出入時有黑日掩日。化外侵中國。掩盡則禍不可言。至于黑橫日中。如分日為兩。亦主鼎分。凡此數種。未知應在何等云云。此變獨宋為多。開寶七年二月丙戌。日生黑子者二。熙甯十年二月辛卯。黑子如李元豐元年閏正月。庚子。黑子如李十二月丙午。復見。二年二月甲寅。復見。崇甯三年十月壬辰。復見。政和二年四月

辛卯黑子乍二月三如粟。又八年十一月辛亥。宣和二年五月己酉。三年十二月辛卯。建炎三年三月己卯。紹興元年二月乙卯。六年十月壬戌。七年二月庚子。四月戊申。八年二月辛酉。十月乙亥。並有黑子。又九年二月。淳熙十三年五月。紹熙四年十一月。慶元六年八月十一日。嘉泰二年十二月四月正月。開禧元年四月。並有黑子。德祐二年二月丁酉朔日。中有黑子如鶩卵相盪。占曰。臣蔽主明。一曰。君有過而不諫。一曰。臣不掩君過。令民見自開寶而下。考諸本紀行事。皆如其占。又考漢書。元帝永光元年四月。日色青白。亡景。正中時有景。亡先是。夏寒至九月。日乃有光。京房易傳曰。美不上人。茲謂上弱。厥異日白。七日不溫。順亡所制。茲謂弱。日白六十日。物亡霜而死。天子親代。是謂不知。日白體動而寒弱。而有任。茲謂不亡。日白不溫。明不動。辟讐公行。茲謂不仲。厥異日黑。大風起。天無雲。日光晦。不難上政。茲謂見過。日黑居亡。大如彈丸。辟不聞道。茲謂亡。厥異日赤。三月乙未。日出黃。有異氣。大如錢。居日中。中央京房易傳曰。祭天不順。茲謂逆。厥異日赤。其中黑。聞善不予。茲謂失知。厥異日黃。

日再出沒

晉元帝太興元年十一月己卯。日夜出。高三丈。中有黑青珥。宋志。日夜出。名曰陰明。

天下大兵臣下凌上。洪水流行。一曰君不祥。社稷亡。郝萌曰。日夜出。有國者亡。兵起。天下饑。以日辰命國。尚書金匱曰。日夜出。紀綱滅。大臣專政。威權黜削。又占曰。日再出。授國亡。君死。兵起。主降於臣。天下亡。又曰。日下而却上。國大亂。是時羣胡交亂。帝逼于強臣。主威不振之象也。又晉愍帝建興二年正月辛未寅時。日殞于地。占曰。日殞于地。天下分裂。天子亡國。此二帝北狩。五胡亂華之象。又占書。日中分。其國亡。或曰。日分為二。有徙王叛民。一曰日裂。君死。臣爭。占書。月出復沒。天下亂。月毀為三四。天下分裂。一曰將相代主。月毀為二。將相有謀。月分為兩。無道之君失天下。月墜于天。國有憂。大臣亡。

陸遜南唐書。盧文進在金陵為客。言昔陷契丹。嘗獵于郊。遇晝晦如夜。星緯粲然。大駭。胡人曰。謂之笠日。頃當自復。良久果如其言。日方午也。

日應外夷

載記劉聰麟嘉元年。東西赤虹經天。南有一岐。太史令康相曰。虹達東西者。許洛以南不可圍也。一岐南徼者。李氏當仍跨巴蜀。司馬獻洛據全吳之象。天下其三分乎。唐正元壬午。有五色雲見長安。太史張琰云。在宋分後一百六十年。有聖人起其地。

至天成丁亥。宋祖生洛陽。金史。訖石烈良弼。帝問。每旦暮日色皆赤。何也。良弼曰。旦而赤。色應在東。高麗當之。暮而赤。應在西。夏國當之。既而夏國有任德敬之亂。高麗有趙位罪之亂。其言皆驗。宋甯宗開禧中。乃金主璟末年。北方有赤氣如血。東西亘天。金處士杜時昇占。謂天下當大亂。亂而南北合為一。後良驗。地志。晉時將樂縣有星墜地。忽成一穴。占者曰。五百歲後當生大賢。宋楊時產此。以為應。夷堅志。紹興壬午五月十六日五更初。月外有環暈五重。附近者紅紫色。白者次之。青者又次之。且以外深紅。各相去一丈。分寸不差。其圓如規。荆大聲曰。是為月重輪。前史記多不過兩三重。而今五數。太陰極盛。恐非太陽之福。未幾高宗巽位。此六事占驗俱奇。宣和初。蜀人王俊明在京師。謂人曰。汴都王氣盡矣。吾夜以盆水直氏房下望之。皆無一星。炤臨汴分野。更于宣德門外掘土嗅之。枯燥無生氣。天星不炤。地脈又絕。而為萬乘都乎。即上書乞都洛陽。天星不炤。他書亦未之及也。

反景

楊用修曰。山海經。長留之山。其神白帝少昊居之。惟員神魄氏之宮。是神也。主司反景。蓋日西入則景反炤。故曰反景。楊雄所謂倒景也。尚書。宅西曰昧谷。寅錢納日。古

文味谷作柳谷。鄭玄曰：五色聚為柳。日入時具五色尚書。錢曰：柳谷屬之。仲秋山海經：司反景亦居之白帝。蓋倒景反照。在秋為多。其變千狀。有作胭脂紅者。諺所謂日沒胭脂紅。無雨必有風也。有如金縷穿射者。古詩所謂日脚射空金縷直。西望千山萬山赤是也。

沉澀淪陰

大人賦：呼吸沆瀣兮餐朝霞。咀噉芝英兮噉瓊華。仲長統詩曰：沆瀣當餐。九陽代燭。王勃詩：朝餐雲母散。夜吸沆瀣精。廣雅：赤霄濛瀛。朝霞正陽。淪陰沆瀣。列缺倒景。皆常氣也。道家服六氣。春食朝霞。秋食淪陰。冬食沆瀣。夏食正陽。并天玄地黃為六氣。朝霞日始放出。赤黃氣也。沆瀣北方夜半氣也。陵陽子明經曰：列缺氣去地千四百里。例景氣去地四千里。其景皆倒在下也。大人賦：貫列缺之倒景兮。涉豐隆之滂濞。

皇極常陰

皇極之常陰。劉向以為春秋亡其應。一曰久陰不雨是也。劉故以為自屬常陰。昭帝元平元年四月崩亡。嗣立昌邑王賀。賀即位。天陰晝夜不見日月。賀欲出。光祿大夫夏侯勝當車諫曰：天久陰而不雨。臣下有謀上者。陛下欲何之。賀怒。縛勝以屬吏。吏

白大將軍霍光時與車騎將軍張安世謀欲廢賀光讓安世以為泄語安世實不

泄召問勝勝上洪範五行傳曰皇之不極厥罰常陰時則有下人伐上不敢察察言

故云臣下有謀光安世讀之大驚以此益重經術士後數日卒共廢賀此常陰之明

效也宋高宗初至杭州久霖雨占曰陰盛下有陰謀時苗傳劉正彥為亂京房易傳

曰有蜺蒙霧霧上下合心蒙如塵雲蜺日旁氣也其占曰后妃有專蜺再重赤而專

至衝旱孟康曰專員也若五月再重赤而員至十一月旱也妻不壹順黑蜺四背又白蜺雙出日中妻以貴高

夫茲謂擅陽蜺四方日先不揚解而溫服虔曰蒙氣解而溫內取茲謂禽服虔曰人君內淫于

禮記聚蜺如禽在日旁以尊降妃茲謂薄嗣蜺直而塞六辰廼除夜星見而赤章昭曰六

辰謂從女不變始茲謂乘夫孟康曰始貴高于夫終行此不變也蜺白在日側黑蜺果之氣正直師古曰果

謂于妻不順正茲謂擅揚蜺中窺貫而外專夫妻不嚴茲謂媾章昭曰媾言媾慢反師古曰音先列也

蜺與日會婦人擅國茲謂頃頃讀蜺白貫日中亦蜺四背服虔曰適不答茲謂不次

師古曰答報也言妻有承順之心不見報答也一曰答對也言不以思意接對之蜺直在左蜺交在右取于不專茲謂危嗣蜺

抱日雨未及君淫外茲謂亡蜺氣左日交于外取不達茲謂不知蜺白奪明而大溫

溫而雨取讀尊卑不別茲謂媾蜺三出三已三辰除也蜺且見西晏則雨除則日出

也

且雨臣私祿及親茲謂罔辟。辟君厥異蒙其蒙先大温已蒙起日不見行善不請于

上。茲謂作福。蒙一日五起五解。辟不下謀。臣辟異道。茲謂不見上蒙下霧風三變而

俱解。立嗣于疑。茲謂動欲。蒙赤日不明。德不序。茲謂不聰。蒙日不明。温而民病。德不

試。空言祿也。試用茲謂主。厥臣大。孟康曰謂君情蔽用人不以蒙起而白君樂逸人茲

謂蔽。蒙日青黑雲夾日左右前後行過。日公不任職。茲謂怙祿。蒙三日又大風五日蒙

不解。利邪以食。茲謂閉上。蒙大起白雲如山行蔽日。公懼不言道。茲謂蔽下。蒙大起

日不見。若雨不再。至十二日解而有。大雲蔽日。祿生于下。茲謂誣君。蒙微而小雨。已

乃大雨。下相攘善。茲謂盜明。蒙黃濁下。陳功求于上。茲謂不知蒙微而赤風鳴條解

復蒙下。專刑。茲謂分威。蒙而日不得明。大臣厥小臣。茲謂蔽蒙微日不明。若解不解

大風發赤雲起而蔽日。眾不惡。茲謂蔽蒙尊掛用事。孟康曰尊三日而起日不見

漏言亡喜。茲謂下。厝用。師古曰厝音于各反蒙微日無光有雨。雲雨不降。廢忠惑佞。茲謂亡蒙

天先清而暴蒙微而日不明。有逸民。茲謂不明。蒙濁奪日光。公不任職。茲謂不絀。蒙

白三辰止。則日青。青而寒。寒必雨。忠臣進善。君不試。茲謂過。蒙先小雨。雨已蒙起。微

而日不明。惑眾在位。茲謂覆國。蒙微而日不明。一温一寒。風揚塵。知佞厚之。茲謂瘳

蒙甚而溫君臣故弼。茲謂悖。師古曰弼猶相戾也悖感也厥災風雨霧風拔木亂五穀已而大霧
庶正蔽惡。茲謂生孽災。厥異霧。此皆陰雲之類也。愍帝建興二年正月己巳朔黑霧
着人如墨。連夜五日乃止。其四年帝降劉曜。

五星聚一舍

星聚人知為吉祥。然其占亦不同。考古今傳記周武王將伐殷。五星聚于房。齊桓公
將霸。五星聚于箕。漢王入秦。五星聚東井。唐玄宗天寶九載八月。五星聚于箕尾。宋
時五星聚于奎。凡五見。而其禍福較異。按漢書五星所聚其國得天下。從歲星以義。
從熒惑以禮。從鎮星以重。從太白以兵。從辰星以法。各以其事致天下。又曰五星所
聚其下起兵。若五星聚于一舍而芒角者。其中所聚之國亡。五星相聚而皆逆行者。
其事逆臣奪主國。五星聚而相鬪。天下大戰。寇賊并起。民庶流離。夷狄為主。又曰五
星合。是謂易行改主。王者有德受慶。子孫蕃昌。奄有四方。無德受殃。離其國家。毀其
宗廟。百姓流離。被滿四方。若四星三星共聚多為不祥。漢書四星合。是謂大盜。其國
兵喪並起。君子憂。小人流。荊州占曰。有德者昌。無德者亡。漢平帝元始四年。四星聚
于柳。又聚于張。其後三河有王莽赤眉之亂。晉懷帝永嘉六年。四星聚于牛女。後有

石勒之亂。漢獻帝初平元年。四星聚于心。又聚于尾箕。後李傕亂京師。而黃巾黑山賊亂天下。漢祚遂亡。晉安帝義熙三年二月癸亥。火土金水四星聚于奎婁。從填星其分為徐州。是時慕容超僭號于齊。兵連齊兗。抄掠淮西。九年三月。水火土金四星聚于東井。井。秦分也。十三年。劉裕滅秦。三星合。是謂驚立絕行。有兵喪。百姓飢乏。漢文帝後六年。水火木合東井。是歲。誅反者周敷于長安市。明年六月。帝崩。景帝元年七月乙丑。金木水合于張。三年。七國反。周亞夫滅之。靈帝元和三年十月。木火金合于市石。明年瑯琊王據薨。獻帝建安十八年秋。木火土俱合于太微。逆行留守帝座。百日。占曰。天下易主。漢遂以亡。晉惠帝元康三年。木金土三星合于畢昴。趙地。其後賈氏殺太子趙王倫。弒后篡位。天下造亂。唐憲宗元和九年十一月。木土金合于女。十二月。土金水合于虛。女危。齊分也。是歲。淄青李師道叛。至二星相合。木火合。為更正革命。其分有兵。君憂人愁。木土合。為內亂。為饑。為亂。變謀口事。人主失勢。木金合。為水。為饑。為疫。為有白衣會。相去五尺。有兵戰。三尺。有破軍。二尺。有拔城。一尺。治兵。木水合。為變謀口事。其國多水。民意。火土合。國憂主走。為內亂。為兵。火金合。曰樂。為喪。不可舉事。用兵。火水合。大旱赤地千里。國主走。秋合有兵。冬合有喪。金土合。為雍。

舊主死。女子亂國。主出走。天下受其害。凡五星至。二星相合。聚其間。火失先。為兵。喪為旱。木失先。人主惡之。土失先。女主惡之。金失先。兵起。亦為喪。水失先。為大水。以日占國。又凡五星合聚。福德先至者。吉。刑禍先至者。凶。福德者。土木也。刑禍者。火水也。福德刑禍。皆以所聚之地言之。若在水鄉。木為福。火鄉。土為福也。

唐懿宗咸通中。樊感鎮星太白辰星。聚于畢昴。在趙魏之分。詔鎮州王景崇被袞冕。軍府稱臣以厭之。

星搖

元光中。天星盡搖。上以問候星者。對曰。星搖則民勞。后伐四夷。百姓勞于兵革。唐開元二年五月晦。大流星如甕。或如盆。貫北斗。並西北。天星盡搖。曙乃止。隋煬帝幸江都。夏侯端說高祖曰。金玉床搖。此帝座不安。參虛得歲。必有真人起于沈寔之次。宋開寶二年九月八日庚午。廣州民見眾星皆北流。知星者言劉氏歸朝之象。

星殞如雨

京房易傳曰。天不任賢。厥妖天雨星。左傳莊公七年四月辛卯。夜恒星不見。夜中星殞如雨。公羊傳曰。如雨者。非雨也。非雨則曷為謂之如雨。不修。春秋曰。雨星不及地。

尺而復君子修之曰星殞如雨董仲舒劉向以為常星二十八宿者人君之象也眾星萬民之類也列宿不見象諸侯微也眾星殞墜民失其所也成帝永始二年二月癸未夜過中夜星殞如雨長一二丈繹繹未至地滅谷永以為王者失道下將叛去故星叛天而殞漢建武十二年正月己未小星流百枚以上或西北或正北或東北二夜止是小民流移之象也隋文帝開皇五年八月戊申有流星數百四散而下五代莊宗同光三年六月庚寅眾星流自二更盡三更而止宋真宗咸平五年八月丙申有星流出東方西南行大如斗有聲若牛吼小星數十隨之而隕宋帝熈德祐元年有二星闕于中天一星隕帝昺祥興元年八月有大星隕于海中小星數千隨之我朝嘉靖十一年十月七日夜星四亂飛落十二年十月初八辛巳亦星隕如雨遂有大同之變

五星為人

晉書凡五星盈縮失位其精降于地為人歲星為貴臣熒惑為童兒歌謠嬉戲填星為老人婦女太白為壯夫處於林麓辰星為婦人吉凶之應隨其象告隋志國有兵凶則星墜為鳥獸天下將亡則星墜為飛虫天下大兵則星墜為金鐵天下有水則星

陸為土國主亡有兵則星陸為草木兵起國主亡則星陸為河星陸為人而言者善
惡如其言國有大喪則星陸為龍秦始皇二十六年有星陸地化為石或刻其石曰
始皇死而地分十六國春秋劉聰淫泆無度時有星隕平陽化為肉元順帝至正十
年十一月有星陸于西原光耀燭地聲如雷鳴者三化為石形如斧一面如鐵一面
如錫削之有屑擊之有聲十六年十一月大名縣有星如火自東南流尾如曳筭墮
入地化為石青黑光瑩狀如狗頭其斷處類新割者十九年歐甯縣有星陸營山前
化為石二十二年臨胸縣龍山有星墮于地掘之得石如磚褐色上有星如銀錄異
記堯時有五星自天而賈一是土之精墮穀城山下其精化為地上老人歲星之精
墮于荆山化為玉側視之色碧正視之色白卞和得之以獻王火星之精陸南海為
大珠光焰數百里紅氣亘天今名其地為珠池金星之精陸於終南山其精為白玉
狀如美玉紫氣覆之水星之精陸張掖柳谷中化為黑石漢末漸有文彩魏青龍年
忽如雷震聲聞百餘里其石自立白色為文有牛馬仙人之狀及玉環玉玦兼文字
果應司馬氏為晉以符金德焉唐太宗時北斗為七僧西市飲酒一行時北斗化為
豕入渾天寺西川章仇兼瓊時太白酒星變為紗帽藜杖四人飲酒宋嘉祐中壽星

變為道士飲酒不醉漢遺史太乙星降于會稽了角面如玉色乘一葉紅蓮

客星為災

雙槐歲抄嚴子陵足加帝腹感動星象高風不可尚已近柳倅桑悅客星亭詔謂客星有五所犯無不苗凶後漢天文志客星犯周野光武崩應之于此不書似因子陵而諱占也且犯帝座與劉聰時入紫微同其太史康相以為大變聰遂滅亡光武無其應豈非政鮮闕失即目前下賢一事亦可弭其災與其論殊新考之客星者一曰周伯大而色黃煌煌然見其國兵起若有喪眾庶流亡去其鄉一曰老子明大色白所出為饑為凶為善為惡為喜為怒兵火起人主憂一曰王蓬蒿狀如粉好拂拂然見其國兵起若有喪白衣之會其邦饑亡一曰國皇星出而大其色黃白望之有芒角見則兵起國多變若有水饑人主惡之眾庶多疾一曰溫星色白而大狀如風動搖出東南天下有兵將軍出于野出東北當有千里暴兵出西北亦如之出西南其國兵喪並起大水人民饑五者實為不祥民懾之語不誣乃通志口星十有二一曰景星二曰周伯三曰含譽四曰王蓬蒿五曰格澤六曰玄保七曰昭明八曰昏昌九曰旬始十曰司晨十一曰菟昌十二曰地維臧光馬總意林神農稽首拜于泰一小

子曰上古之人壽過百無口落之咎獨何氣之使耶泰一小子曰天有九門中道最良日月行之名曰國皇。字曰老人。出見西方。長生不死。眾曜同光。則國皇老子周伯王蓬蒿。非妖星不可曉者。又稱周伯王蓬蒿。皆古者高世不仕之人。王其姓蓬蒿其名。周伯其姓氏也。或曰。客星者。老子非李耳古之有德行不仕老而有壽之人。國皇者。國姓温星者。温姓俱有操行而不仕者。則似因子陵附會耳。漢書元鳳四年九月。客星在紫宮。中斗樞極間。占曰為兵。其五年發三輔郡國少年。詣北軍。地節元年六月。客星居左右角間。東南指長可二尺。色白。占曰有姦人在宮廷間。又客星見貫索東南。行至七月夜入天市之交。東南指其色白。占曰有戮卿。一曰有戮王。是時楚王延壽謀逆自殺。霍光夫人顯謀反伏誅。黃龍元年三月。客星居王梁東北。可九尺。長丈餘。西指出閣道間。至紫宮。其十二月。宮車晏駕。元帝元初元年四月。客星大如瓜。色青白。在南斗第二星東。可四尺。占曰為水饑。其五月。渤海水大溢。六月。關東人大饑。二年五月。客星見昴分。居卷舌東。可五尺。青白色。炎長三寸。占曰天下有妄言者。其年十二月。鉅鹿都尉謝君男。詐為神人論死。父免官。其為災亦可概見。而史記天官書。三能三衡者。天廷也。客星出天廷。有奇令。則又似不甚係災祥者。小說漢武帝

微行。造主人家。家有婢。國色。帝悅之。夜與主婢。因有一書生。亦寄宿。善天文。忽見客星。將掩帝座。大呼咄咄。俄見一男子。操刀將入戶。聞書生聲甚急。謂為已故。遂縮走。客星應時而退。何與子陵事相彷彿也。

彗孛不同

彗孛考諸記傳。類以為一星。左氏有星孛于大辰。申須曰。彗所以除舊布新也。公羊曰。孛者何。彗星也。文十四年。有星孛于北斗。杜預曰。孛彗也。周史服曰。不出七年。宋齊晉之君。皆將死亂。劉歆以為北斗有環城四星入其中。彗所以除舊布新。斗七星。故曰。不出七年。哀十三年冬十一月。有星孛于東方。劉歆以為孛。東方大辰也。不言大辰。旦而見。與日爭光。星入而彗。猶見漢高三年七月。有星孛于大角。劉向以為彗。將滅。故彗除王位也。宣帝地節元年。有星孛于西方。去太白二丈。所劉向以為太白。為大將。彗白加之。掃滅象也。郭璞釋爾雅。亦云彗。妖星也。亦謂之孛。綜其實不然。考漢書文穎注。彗星孛星。長星三星。其占畧同。而形小異。孛星光芒短。其光四出。蓬蓬勃勃。然彗星光芒長。參之如掃帚。長星光芒有一直。或竟夭。或三十丈。或十丈。大率孛彗多為除舊布新。大災。長星多為兵革事。晏子。君高臺深池。賦斂如弗得。刑罰恐

弗勝。孛星將出，彗何懼乎？然則孛甚于彗也。宋約鉤命訣註彗五彗也。蒼則候王破天子苦兵，赤則賊起強國恣，黃則女害權奪于后妃，白則將軍逆。二年兵火大作，黑則河決賊處處起，佛經稱夜叉口烟為彗。龍王身光為憂流迦，此言天狗晉書。歲星之精流為天棊，天槍，天沖，天滑，國皇反登昏蒼彗。熒惑散為昭且昭明，蚩尤之旗司空天撓皆赤彗。填星散為五殘獄漢大賁昭星絀流，旬始蚩尤虹蜺擊咎黃彗。太白散為天杵，天附，伏靈，大敗司姦，天狗，天殘，卒起白彗。辰星散為枉矢，破女拂，樞滅寶鏡，經驚理，大會祀黑彗。京房集星章歲星所生妖星曰天槍，曰天根，曰天荆，曰真若，曰天樓，曰天垣，熒惑所生妖星曰天陰，曰晉若，曰官張，曰天惑，曰天雀，曰赤若，曰蚩尤。鎮星所生妖星曰天上，曰天伐，曰從星，曰天樞，曰天翟，曰天沸，曰荆翟，太白所生妖星曰若星，曰帚星，曰若彗星，曰竹彗星，曰墻星，曰棖星，曰白翟。辰星所生妖星曰天美，曰天冕，曰天社，曰天麻，曰天林，曰天高，曰端下，微有異同。孟康曰：五星之精散為六十四變，志記不盡也。黃帝占甲寅之日，有青方氣在日旁，此歲星之精將為彗也。丙寅之日，有赤方氣在日旁，此熒惑之精將為彗也。戊寅日，有黃氣在日旁，此填星之精將為彗也。庚寅日，有白方氣為太白，壬寅日，有黑方氣為辰星，出則災在其分及衝。

宋中興天文志。李者黃帝時一女子。修行不得其死。五行戾氣蓄結而為李也。

星有三類

星有三類。一經星。北極為之長。二舍星。大火為之長。三行星。辰星為之長。故皆謂之辰。北辰居其所而眾星拱之。故為經星之長。大火天王之座。故為舍星之長。辰星日之近輔。遠乎日。不過一辰。故為行星之長。天文志。星者金之散氣。其本曰人星。眾國吉。少則凶。有大小明暗三色。其最大者紅。次黑色。最小者黃色。佛經言。星宿之度。大星一繇旬。小星三百步。樓炭經則云。大星周七百里。中星四百八十里。小星三十里。瑜珈論稱諸星宿中。其星大者十八拘盧舍。其中者十拘盧舍。小者四拘盧舍。徐整長曆。大星徑百里。中星五十里。小星三十里。漢書。凡五星色皆圓。白為喪。為旱。赤中不平為兵。青為憂。為水。黑為多死。黃吉。又曰。黃地之爭。白。哭泣之聲。青。為兵。憂。黑。為水。五星同色。天下偃兵。百姓安甯。

鎮星為福

洪景廬曰。世之伎術。以五星論命者。大率以火土為惡。故有晝忌火。夜忌土之語。土鎮星也。行遲。故每至一宮。為災最久。然以國家論之。則不然。苻堅欲南伐。歲鎮守斗。

識者以為不利。史記天官書五潢五帝居舍。火入旱。金兵。水火宋均曰不言木。土德星不為害也。又曰五星犯北。濟軍起。火金水尤甚。木土軍吉。又云鎮星所居國吉。未當居而居。已去而復還。居之其國得土。若當居而不居。既已居之。又西東去。其國失土。其居久。其國福厚。其居易福薄。如此則鎮星乃為大福德。與木無異。豈非國家休祥。非民庶可得侔耶。然今之言星命者。各以生之所值度數分經。別五星恩仇。不盡惡火土。而如女土。蝠氏土。貉柳土。獐之類。則忌木星。不以為德星也。

流星名狀

流星者。天皇之使。五行之散精也。自上而降曰流。自下而升曰飛。一曰天使。二曰天暉。三曰天雁。四曰天保。五曰地雁。六曰梁星。七曰營頭。八曰天狗。流星之為天使者。有祥有妖。為天暉。天雁者祥。流星夜隕而為天保者祥。為地雁。為梁星者妖。流星晝隕。或夜隕。而為營頭者亦妖。流星之大者為奔星。夜奔星隕而為天狗。其妖甚矣。尾丈二三丈。暉然有光。竟天色白者。主使也。色赤者。將軍使也。流星有光。其色黃白。從天而下。有音如炬。燦火下地。野雉盡鳴。斯天保也。所墜國安有喜。流星其色青赤。從天墜地。名曰地雁。所墜兵起。有光青赤。其長二三丈。名曰天雁。軍中之精華也。其國

兵起將軍當從星所之流星暉然有光白色長竟天人主之星也上相將兵從星所
之大如缶其光赤黑有喙者曰梁星其所墜鄉有兵君失地大流星隕於軍上謂之
營首亦曰營頭之星不有破軍必有殺將流星甚大流星中途炸為三五八九燦然
有聲謂之天狗一曰大流星色赤墜地山雉皆鳴羣犬奔吠者謂之天狗或曰日將
出及將沒之時有五色氣長數丈或如長虹或赤氣如血從天墜下或從濁升于天
中者天狗也李淳風曰天狗出入濁間不出入列宿墜地者為天狗不墜地者為流
星也見則兵起大戰天下大饑人相食飛星大如缶若甕後皎然白前卑後高搖頭
乍下名曰障右所下民食不足飛星大如缶若甕後皎然白曲環如車輪名曰解御謂自
從者多死王削色而不戰飛星大如缶若甕後皎然白長數丈黑滅後白化為雲流下
相食其國人相斬爵祿飛星大如缶若甕後皎然白長數丈黑滅後白化為雲流下
名曰天滑所下有積尸流血飛星大如缶若甕後皎然白白縵縵然長可十餘丈而
委曲名曰天形一曰天飾見則將軍有功封疆流星大如缶若甕中天曳尾者名曰
大奸下有流血大臣起謀百姓相食天下大亂荆州占曰流星以人定至夜半見者
期以年夜半後至雞鳴期以月雞鳴後至明者期以日也又妖星一曰彗本類彗小

者數寸。長或竟天。傳曰為光。夕見則東指朝。見則西指。見則兵起大水除舊布新。二曰孛星。彗之屬也。偏指曰彗。芒氣四出曰孛。見則非內有大亂。即外有大兵。三曰天棊。一名覺星。末銳而長。本類星。末銳長四丈。主爭奪。石氏曰。天棊出其國凶不可舉事。四曰天槍。雲狀如馬。或曰。天槍左右銳長數丈。本類星。其出必有破國亂君。又為早饑暴疾。五曰天挽雲。如牛狀。一曰白少而數動。出則其下人相讒。巫咸云。彗類末銳。主捕制。六曰蚩尤旗。類彗而後曲象旗。或云。赤雲獨見。或云。其色上黃下白。可長二三丈。見則王者征伐四方。不則國有大喪。七曰天衝。其狀如人。蒼衣赤頭不動。見則臣謀。主武卒廢。天子出。八曰國皇。大而赤。類南極老人星。去地三丈。如炬火。見則有急兵。九曰昭明。象太白。大而白無角。乍上乍下。或曰。西方有星。望之去地六丈。白而有光。類太白。祭之中赤。見則伯者出一。曰光芒。不行所起國兵多變。大人凶。十曰司危。如太白有目。或曰。大而毛有角。見則其下國相殘。賊主失國。臣行主權。十一曰夫讒。狀如劍。或如鈎。長四五丈。數動。出則其國內亂。下相殘。赤地千里。枯骨藉藉。十二曰五殘。一名五鋒。類辰星。大而赤。祭之中青。星表有氣如暈。見則政在伯國。有兵喪。十三曰六賊。形如彗。大而赤。動有光。一曰六賊。形如彗。色白。長四十丈。出正南。

去地可六丈。太白之精出則天下亂。十四曰獄漢。一曰咸漢。出正北去地可六丈。出則主兵喪。諸侯驚動。大而赤數動。察之中青。或曰赤表下有三星。縱橫主逐。主刺玉。十五曰旬始。出北斗旁。狀如雄雞。怒則赤黑色。象伏鶩。出則天下有兵。其國不甯。十年聖人起。代羣橫。十六曰天鋒。象彗。天鋒出必有亂。臣戮死于下。十七曰燭星。狀如太白。出則城邑亂。有土功。其出不行。不久而滅。上有三星。又以五色占。十八曰蓬星。大如二斗。器色白。又曰玉蓬。狀如夜火之光。多至四五。少亦一二。長不過三丈。出則有亂。臣有亡國。大水大旱。五穀不收。人相食。十九曰長庚。如一疋布。見則兵大起。二十曰四填星。出四隅。大而赤。去地六丈。將以夜半出。兵在其下。二十一曰地維。光出四隅。赤黃搖頭。狀類填星。出東西隅。天下大旱。出西南兵起。出西北天下大亂。二十二曰昏。見出西北方。中赤外青。氣環之。見則天下兵起。高十丈。期一年。二十三曰年。三十丈。三年。又天杵星。狀如太白。出五芒。見在大旱兵起。亡國星似老人。或旁附一小星。玄冥星狀如雄雞。色黃赤。出則兵起。國不甯。鏡星出。離地可四丈。似月。見則為上下乘亂。無德者亡。有德者昌。鏡星似流星。有火光。有聲。陸地如火。圓如數畝。田上有黃光。見則千里破軍殺將。夷人星。中有一大星。其旁小星聚圍之。見則外夷

犯邊兵戈大起。蓬頭星狀如人頭有亂髮。見則謀事之臣叛稼穡星有四星。類墳墓。見則大稔。朝拂星光芒如拂。見則有國家宗社事。龍拔星其狀如拔出。則王者多子孫。百埃星狀如氣埃。氣中有光。見則諸侯多事。人民不安。毛毳星狀如毳。有毛。見則國多苛暴之政。履齒星狀如細齒形。見則兵起人災。靈芝星狀如芝草。見則天下太平。將相星有二星。並見大小相逐。見則大臣有文武之德。流天星狀如矢。見則天下不甯。六害星有六星。並出。光芒相約。見則其分外國進寶物于朝。氣中星赤氣中見三星在西北方。見則有誘害大臣之事。雲附星赤雲中見二星。一大一小。見則大暑。天下大疫。破女星狀類彗。芒氣雙出。見則有大兵。喪饑疫兵起。蟬散星有芒氣上出二星。見則兵起人災。已上各星。占書載之。然不多見也。若史傳中星變之。尤可驚愕者。蜀后主建興十三年。諸葛亮率大衆伐魏。屯于渭南。有長星赤而芒角。自東北往西南流。沒入亮營。三投再還。往大還小。占曰。兩軍相當。有大流星來走軍上。及陸軍中者。皆破敗之徵。未幾。亮卒于軍。焚營而退。羣帥交惡。互相誅殘。魏明帝景初二年。司馬懿圍公孫康于襄平。夜有大流星長數十丈。白色有芒鬣。從首山東北流。陸襄平城東南。占曰。圍城而有流星來走城上。及陸城中者。破。又曰。星所陸。國易姓。無何。康

突圍走。至星墜處被斬坑其衆。魏景元四年。有流星二。並如斗。見西方。分流南北。先
炤地。隆隆有聲。占曰。流星為貴使。大者天使。是年鍾會鄧艾伐蜀。乃二星之象。二帥
相背。分流南北之應。鍾鄧既死。三軍忿怒。隆隆有聲之應也。元帝永昌元年。有流星
大如甕。長百餘丈。青赤色。從西方來。尾分為百餘。岐而散。時王敦作亂。百姓流亡之
應也。唐文宗開成二年。二月至三月。有彗星見于危。初長七尺。漸歷虛女斗房。亢張
六合。初指西而南。而東而北。長至八丈。凡彗星辰出。則西指。夕出則東指。未有遍指
四方。凌犯如此之甚者。此奄宦得志。縉紳禍烈之應也。又漢成帝元延元年。四月丁
酉日晡時。天暝晏。殷殷如雷聲。有流星頭大如缶。長十餘丈。皎然赤白色。從日下東
南去。四面或大如雞子。燿燿如雨下。至昏止。占者為王者失勢。諸侯起伯之異也。元
和六年三月日晡。天陰寒。有流星大如一斛器。墜宛郟間。聲震數百里。所墜之上。有
赤氣如立蛇。長丈餘。乃滅。野雉皆雊。又十二年九月甲辰。有流星起天中。首如甕。尾
如二百斛船。長十餘丈。聲如羣鴨。飛明如火炬。須臾墜地。有大聲如壞屋者。三。唐昭
宗天復元年五月。有三赤星。各有鋒芒。在南方。既而西方北方東方亦如之。頃之。又
各增一星。凡十六星。少時先從北滅。占曰。彗星也。見則諸侯兵相攻。天祐二年三月

乙丑夜中有大星出中天。如五斗器。流至西北。去地十丈許而止。上有星芒。炎如火。赤而黃。長丈五許。而蛇行。小星皆動。而東南其隕如雨。少頃沒。宋仁宗天聖六年四月甲申。漏欲盡。有星大如斗器。自北方至于西南。光焰地有聲如雷。曳尾跡長數丈。久之散為蒼白雲。金大安二年正月庚戌朔。日中有流星出。大如盆。其色碧。西行。漸如車輪。尾長數丈。没于濁中。至地復起。光散如火。至正二十六年十一月戊子。熒惑犯太微東垣。上相太白犯鏡閉。己丑。流星如酒杯。大分為三星。繫相隨。前一星色青。明。後二星色赤。尾跡約長二丈餘。起自東北。後緩往西南。没于近濁。閩書。萬歷六年正月初六夜。有星如日。出自西方。眾星皆西環。塵餘載萬。歷壬寅八月二十五日。福建地方見一長星。頭大紅色。尾去白色。霹靂一聲。中裂開紅色。四圍白色。身一能動。九月初八日夜。一星大如椀。色如血。頃刻分為五。大各如椀。半夜合為一。四更復分為五。至五更復為一。大如米籬。鷄鳴時。又復縮如椀。

彗掃文昌

震澤長語。成化末。正旦日申時。中天有白氣如練。仰視之。宛轉如一白蛇。漸升漸消。消且盡。忽有聲如雷。蓋天鼓也。正德初。彗星掃文昌。春官云。應在內閣。未幾逆瑾出。

首逐內閣大學士劉健謝遷。自是而後一時在位無不被其禍。乃知文昌為天下斯文之應。不止內閣而已。后唐天祐三年四月。彗出西北。掃文昌軒轅天市宰相柳璨。希梁王全忠旨。歸其譴於大臣。于是僕射裴樞。獨孤損。崔遠守。趙崇。王贊。王溥。陸扆。皆同日賜死。白馬驛。蓋千古同符矣。天官書。斗魁戴筐六星。曰文昌。一上將。主建威。武。二次將。主正左右。三貴相。主理交結。四司命。主賞而進德。五司中。司過詰咎。六司祿。主諸理大寶。天文錄。文昌六星。在北斗魁前。紫微垣西。天之六府也。主集計禍。禍。明天道。黃雲入。三公受賜。蒼白入。將相憂。赤黑入。三公黜。黃帝占曰。文昌官者。天府之離宮也。其星明大齊同。則王者致太平。天端臻。不明。則道術隱藏。其色黃潤光明。則萬民安。青黑微細。則天下多憂。人相殘害。動搖移徙。則三公受殃。不則女主忌之。又日暈文昌。有大赦。期百日。歲星犯文昌。石氏占曰。天下兵起。有走玉。熒惑入文昌。黃帝占曰。宮廷中有兵。天下耗。石氏曰。天下大亂。王者憂亡。郝萌曰。火守司祿。民大疾。舍司命。童子疾。太白入文昌。春秋緯曰。三軍反。兵滿國都。國以弱亡。客星犯文昌。石氏曰。輔臣有殃。一曰。大臣謀叛。宮中有兵。客星入文昌。有女子惑天子者。流星出文昌。三公出鎮。視其所之。知其地。一曰。貴出師。又曰。貴臣將相。有下獄貶黜者。以色

占之流星衝文昌公卿大臣有憂。一曰文書事。彗孛犯文昌輔臣災。一曰三公下獄。有急公易政。彗孛出文昌。天下亂。大臣受殃。國易政。漢靈帝熹平二年四月有星出文昌入紫宮。蛇行有首尾無身。赤色有光。炤垣墻。占曰文昌為上將貴相主大臣不利。北齊后主天統元年六月壬戌彗星出文昌東北其丈如手。后稍長乃至丈餘。百日乃滅。

太白晝見

甘氏曰太白在秋曰玉其色比狼星精明而有光。仲秋之時有芒角在四時曰相其色精光而無芒角。在冬曰休其色精明而無光。在春曰囚其色青黃而無明。在夏曰死其色赤黑細小而不明此其常也。太白陰星出西當伏西出東當伏東過午則為經天晝見與經天不同者晝見為當晝而見經天則順行至未逆行至巳而不伏故昏旦當午而見所以出東而入西出西而入東也。晝見不必經天經天則必晝見以其去日遠也。古今惟秦始皇時太白經天。桓帝延熹九年七月丙戌太白晝見經天。晉安帝義熙元年至恭帝元興元年太白經天。唐高祖時武德九年六月太白經天晝見則甚多。占曰太白晝見有兵兵亡無兵兵起。一曰為兵變為不臣為更王強國。

弱。弱國強。太白經天。天下革命。更主人。流亡。一曰。海內悲涼。九州動搖。負兵奪糧。四夷交侵。天下攘攘。一曰。不出三年。有大喪。大臣有殃。

天雨穀

崇禎五年九月。余邑中天雨穀。有拾得者。顆粒比常稻加長。差駭黑耳。按京房易逆利。曰。天雨穀。歲大熟。或以為有年之兆。然次年癸酉歲。收殊歉。不知其何祥也。因考之史傳。吳桓王時。天雨五穀于貧家。富家則不雨。涼州張駿九年。武威燉煌。天雨五穀。倉頡造書。天雨粟。燕丹留秦。天雨粟。漢武。帝建元四年。天雨粟。宣帝地節三年。長安雨黑粟。元帝竟甯元年。南陽山郡縣雨粟。赤青黑大者如豆。小者建初元年。九江壽江雨粟。光武建武二十年。清河廣州雨粟。大如莧。呂后三年春。天雨粟。禹時。天雨穀。漢宣帝時。江淮天雨穀三日。尋魏地。秦亡。穀二千頃。建武三十一年。陳留天雨穀。遼道宗咸

維四年六月壬子。西北路天雨穀。方三十里。漢武時。廣陽縣天雨麥。梁武成八年。齊國天雨黍。元康四年。南昌天雨豆。明帝永平十八年。下邳雨大莖。似槐實。宋神宗元豐

二年六月。忠州天雨豆。七月。南賓縣天雨豆。哲宗元祐三年六月。臨江縣雨白黍。七

月。又雨黑黍。紹興十六年。瀘州天雨豆。孝宗乾道四年春。舒州雨黑米。堅如鐵。破之。米心通黑。

全完顏大定十六年臨漢天雨豆形銳小而赤宋至道二年四月福清縣雨黃黑豆

又長樂太平二鄉雨黑豆皆堅實元世祖至正十一年十月衢州東北雨米如黍十

一月浦城雨黑子如稗邵武雨黑黍如蘆信州雨黑黍都陽縣雨菽豆洪武六年六

月十九日未時廣州天雨米如白梗米身粗小成化二年六月順德天雨米形小而

黑弘治辛酉秋忠州下黑子形如椒味如稻久而嘉靖三十四年十月常熟縣天雨

如赤莖者至正壬辰三月湖州有物若葉核與雨雜下五色充瑩食之似松子閏月

特甚則凡雨五穀其為瑞為災亦隨其世之治亂耳若雨他物者率非祥徵占書曰

凡天而下物非人所聞見者皆大兵之兆其災見所主國分如雨草則元帝永元二

年八月天雨草葉相膠結如彈丸平帝元始三年正月天雨草宋太始四年正月行宮天雨

草雨粟則魏武時河內天雨粟雨酸棗則周秦間河內雨酸棗雨花則隋仁壽二年

雨水銀花四年陝西又雨金銀花雨木則唐德宗貞元年陳留天雨木大如指長寸

立如宋紹熙五年行都亦雨木垂拱四年三月台州雨桂子旬餘元豐三年六月統

州長山雨李類山雨毛則武帝天漢元年二月天雨白毛三年八月天雨白髦晉武

帝泰始八年五月蜀地雨白毛隋文帝開皇六年京師雨毛如髮長者三尺餘短者六七寸宋神

宗熙甯元年。襄陵間天雨白鬚。如馬尾長者尺餘。彌漫山谷。三月潭州雨毛。八年五月雨黃毛。元

二年六月。彰德雨毛。元順帝仍改至元三年三月。彰德雨毛。如絲而絲俗呼曰菩薩線。嘉靖三十

九年五月。興化雨毛。四十年夏。又雨毛。雨絲。則至正十三年七月。安溪雨白絲。雨鉛。

則漢河間天雨鉛。今有雨鉛城。雨碧。則惠成王鄭國七年。天雨碧。雨綿。則漢永和時。長安

雨綿。雨骨。則梁惠成王八年。亦脾天雨骨。後國機。雨魚。則漢成帝鴻嘉四年秋。信都

天雨魚。長五寸以下。時王氏專攻。十六國春秋。蜀李期末年。宮中雨黃色魚。是年為李壽所殺。赫連鳳翔

元年。唐元和十四年。俱雨魚。僖宗光啟二年。揚州雨魚。元至正二十五年六月。大都

雨魚。雨虫。則魯閔公三年秋。宋雨虫。雨肉。則紂時。天雨肉。漢桓帝建和三年秋。七月

北地雨肉。似羊肋。或大如手。是梁冀專攻。愍帝建興元年十二月。河南地震。雨肉。平陽雨肉。長三十

步。廣二十七步。傍有哭聲。是聞百里。雨血。則漢惠帝二年。宜陽天雨血一頃。哀帝建平四年四

月。山陽湖陵雨血。廣三尺。長五尺。大者如錢。小者如麻子。永康元年。尉氏雨血。後齊河清二年。

太原雨血。唐高祖武德初。突厥雨血三日。貞元二十一年。京師雨血。宋仁宗慶歷三

年十二月。天雄軍德博州降。紅雪化為血。順宗元統二年正月。河南雨血。腥氣逼人。洒塗衣。

赤。霖皆赤。至正五年四月。丹陽縣雨紅霧。濡草木衣。霖皆紅。嘉靖七年七月。南京天雨血。雨黑水。

則宋淳熙十一年二月。新城縣雨黑水。至正十七年正月。杭州雨黑水。雨水銀則隋

仁壽二年。宮中雨水銀。紹興二十六年七月辛酉夜。天雨水銀。雨錢則王莽時。天雨

五銖錢。至地化。宋紹興二年七月。天雨錢。輪郭肉好。雨金。則禹時。天雨金。凡二。周成

王時。咸陽天雨金。今咸陽有。顯王時。櫟陽雨金。漢惠帝時。宮中雨黃金。黑錫。漢時翁

仲家貧。力作居渭川。天雨金十斛於其家。述異記。秦二世元年。宮中雨金。頃刻化垂

拱三年七月。廣州天雨金。雨石。則紂之末年。天雨石如甕。弘治庚戌三月。陝西慶陽

府雨石。大者如鸞卵。小者如雞頭。實。嘉靖三十年。連江雨石。有聲。魏武帝末年。鄴中

雨五色石。雨寶珠。則梁大同中。雨雜色寶珠。雨紙錢。則宋建炎二年。留守杜充營中

天雨紙錢。厚盈寸。明日與金人戰。賊縛。雨箋。則張仲舒在廣陵庭中。天雨絳羅箋。經宿。暴雨琉璃。

則至正六年九月。彰德雨雪結成琉璃。雨羊。則乾符二年。洛陽建春門外。因暴雨。有

物墜地如羖羊。不食。頃之入地中。其跡月餘不滅。或以為雨工。雨鹿。則成帝時。宮中雨蒼鹿。雨湯

則咸通八年七月。下邳雨沸湯。殺鳥雀。雨灰。則殷紂時。天雨灰。梁大同二年。天雨灰。

其色黃。若雨塵。雨沙。史不絕書。而至元二十四年。諸王薛徽都。部雨土。至七晝夜。深

七八尺。牛畜盡死。則其尤異者。又考京房易傳曰。天雨黍粟。大人出走。春秋潛潭巴

曰天雨粟無德者興有德者不祿小人進大臣辱易占曰天雨粟不肖者食祿與三公易位天雨稻黍者亡天雨稻大臣當誅占曰君吝于祿信衰賢去厥妖天雨草又曰天雨草恠祿信衰雨赤草其民流臣專政又曰人君多殺無辜則天雨金宋志雨金鐵是謂刑獄主兵災隋書曰非吉祥有亂臣也漢書曰天雨水后妃臣為亂京房易傳歸獄不解茲謂追非厥妖天雨血又曰佞人祿功臣僂天雨血又曰天雨血茲謂不親民有怨心不出三年無其宗漢書天雨魚帝道陵夷臣下專政內記云天雨膏師敗一曰將敗國有急一曰君暴虐弼臣多貪賢士遠出雨肉將易君雨水銀是謂荆祖不出三年兵喪並起亡國失主后魏書曰天雨錢天下亂隋書曰天雨毛衆役煩興兵徐不息京房傳前樂後憂厥妖天雨羽又曰下人相食宋志君不道天下逆天雨羽又曰邪人進賢人逃天雨毛易妖曰天雨毛羽貴人出走骨肉踈而主暴虐天鏡占曰天雨羽毛有喪不出九年兵起易飛候曰天雨毛羽大風為災天雨爵錫為飢不出三年改易王者爵錫如甘露白者為甘露黃者為爵錫天雨絲綿天下有兵喪不出六年大亂天雨絮兵起國將喪無后天雨如杼白其國饑天雨笠國大饑天雨戰不出三年兵起天雨築其國君有咎天雨水水失其性大人疫易飛候

曰天雨草國有殃民破亡春秋演孔圖八政不中則天雨刀祥災集天雨墨君臣無道饒人進宋志曰雨石位不施君長凶天雨續大饑民亡續如麻苧脆如地毛天雨黃沙其下逆兵起天雨黃塵天下大饑宋志天雨物人莫識者大兵起天雨釜甑入將相食天雨霾民勞祿不肅占書天雨禽獸是謂不祥不出三年其下兵起一曰民流亡有喪天雨魚鱉民流亡臣專政有喪天雨虫人君暴虐不親骨肉而親他人其國兵災並起劉向曰刑法暴虐貪叨無厭天雨虫天雨骨是謂陽消王者德衰令不行佞人進用不出三年有內爭易飛候曰師將破亡一曰其國大饑人相殺食天雨筋其國大亂天雨赤雲有大兵起大戰有亡國天雨花國有喪天雨木君臣不和讒臣進用其歲多風五谷傷民多死一曰人多兵死天雨土君失封五行傳是謂黃請土失其性也百姓勞苦而無功京房易傳曰內淫亂百姓勞不肖者祿則天雨土易飛候曰天雨土主不安外戚有謀天雨石為政者廢位不施為詐妄行國君死亡又曰天雨石民流亡甘氏曰無雲而雷隕石陸地大及一丈形如雞子兩頭銳名天鼓所下之邦必有大戰伏屍數萬近三年遠七年天雨沙民饑君失國天雨反君暴虐無道

前考天雨物尚有一二未盡者河間王子元家雨六七寸小兒又魏文帝時安陽殿前雨米李金史哀宗天興三年正月己酉京索間雨血十餘里草木子載至正壬辰雨粉鐵于湖廣民家戶壁間雲南志至正元年雲南碯嘉縣雨鐵民舍山石皆穿至正二十一年昆明縣雨鐵七修類稿本朝正德三年雨紅水于杭州都御史錢鉞家嘉靖八年夏杭州城內雨黑水

雨雹作男女鳥獸形

史傳所載雹災如地節四年五月山陽濟陰石勒時西河界俱雹如雞子蜚鳥皆死成帝河平二年四月楚國雨雹大如斧蜚鳥皆死元至正十一年四月彰德亦雹形如斧楷粒無遺宋政和七年六月京師雹大如拳萬曆二十六年長泰雹大如拳慶元三年四月雹大如椽破瓦殺鳥雀正光元年河西初平四年六月右扶風石遵時鄴中俱雹天如斗武帝元封中雹大如馬頭至正六年二月興國州雨雹小者如雞子大者如馬頭極矣尤可駭者金世宗大定十一年六月戊申西南路招討司必里海水之地雨雹三十餘里小者如雞卵其一最大廣三尺長丈餘四五日始消崇禎十年又四月十五日武鄉縣雨水雹知縣程世能親驗見有如象大者二塊如牛

大者數十塊。稽神祿載陽行自言天祐中在古城避暑于佛寺。忽聞大聲震地走視門外。見一電其高與市樓等入地丈餘。數日乃銷。宋紹興八年五月。汴京大康縣大雷雨。下水龜數十里大小皆龜形。具手足卦文。熙甯中。河州雨雹。大者如雞卵。小者如蓮芡。或如人頭耳鼻口目皆具無異鵝刻。又有如環佩者。如卵如彈者。玲瓏有數色白而豎。元仍改至正四年四月癸巳。清州八里塘雨雹。大過如拳。有如龜如獅象如環玦如小兒形者。萬曆二十三年五月十三日山東臨邑縣雨雹。盡作男女鳥獸形。見邢太僕侗志。

天下盡風

風之異者。漢書漢昭帝元鳳元年。燕王都薊。大風雨。拔宮中樹七圍以上。十六株。元帝建始元年十二月。大風拔甘泉時中。大木十圍以上。元初六年夏四月。沛國渤海大風。拔樹三萬餘株。習鑿齒晉陽秋。惠帝永康元年十一月戊午朔。大風從北來。飛石五六日乃止。吳孫權太平元年八月朔。大風江海湧漫。平地水深八尺。拔南陵樹二十株。石碑碾動。吳兩城門飛落。晉元帝永昌元年七月丙寅。大風。屋瓦皆飛。天統七年三月。大風發屋拔木五日乃止。隋文帝開皇二十年十一月。京師大風發屋拔

木秦隴壓死者千餘人。仁壽二年。西河有胡人乘驛在道。忽為迴風所飄。并一車上
千餘尺。乃墜。皆碎焉。憲宗元和八年六月庚寅。京師大風雨。毀屋飄瓦。人多壓死者。
丙申。富平大風。拔棗木千餘。文宗太和九年四月辛丑。大風拔木萬株。墮舍元殿四
鵝尾。拔殿庭樹三。壞金吾仗舍。廢城門樓觀。內外三十餘所。光化西城十數雉。堞懿
宗咸通六年正月。絳州大風。拔木有十圍者。宋太祖乾德二年五月。揚州暴風。壞軍
營舍。僅百區。開寶九年四月。宋州大風。壞甲仗庫。城樓軍營民舍。凡四千五百九十
六區。太宗太平興國六年九月。高州大風。壞廨宇民舍七百區。七年八月。瓊州颶風。
壞城門州署民舍殆盡。八年九月。太平軍風。拔木壞民舍千八十七區。十月。雷州颶
風。壞廩庫民舍七百區。大中祥符二年九月。無為軍大風雨。拔木。壞城門營壘民舍。
壓死千餘人。元豐四年七月。秦州風作。繼以大雨。漫州城。壞公私廬舍數千間。又通
州靜海縣大風雨。壞官私廬舍二千七百六十三楹。嘉定二年八月癸酉。大風。大木
皆拔。丙子九月。壞陵殿宮墻六十餘所。折陵木二千餘株。其餘言折木壞屋。飛沙石。
失舟楫者。不可勝書。夢溪筆談。宋熙甯九年。恩州武城縣有旋風。自東南來。望之。插
天如羊角。大木盡拔。俄頃。旋風卷入雲霄中。所過縣城官舍民居。悉盡。悉卷入雲霄。

中縣地兒女奴婢卷去復墜地死傷者數人。民間死傷亡失不可勝紀。縣城為空。按
抱朴子。凡大風非常。三日三夜者。天下盡風也。二日二夜者。天下半風也。一日一夜
者。千里風也。乙巳占曰。凡風動葉十里。鳴條百里。搖枝二百里。獵葉三百里。折小枝
四百里。折大枝五百里。飛沙石一千里。拔大樹五千里。占書風發一日為其縣。二日
他縣。三日其郡。四日他郡。五日其州。各以日數知災所及。凡風一日為邑。二日三日
為郡。四日五日為國。六日七日以上為天下。初遲後疾者。其來遠。初急後慢者。其來
近。占書曰。凡暴風忽起。擺樹鳴條。風勢及急。未及一二刻漸微而止者。其風遠。不過
十里。當視日辰占之。在刑冲方。則外界有送盜賊。至在德方。則外界有送祥異。至在
合方。則外界有送書信。至風驟起。經半時止。此風在三百里來。其占在民刑冲方。月
內米貴。德合方。月內賊來。在日辰本位上來。民間有火。凡風驟起。吹沙走石。經一二
時止。風在五百里以上。千里以下。其占在大臣長吏。單視月建。半日一日兩日。當視
太歲支干。又曰。凡風二日二夜事。及三千里外。一日一夜事。及二千里。六時以上事
及千里。半夜半日三時以上事。及五百里。一時以上事。及百里。又曰。凡天子占千步
諸侯去宅五百步。庶人去家一百步。占之。郎仁寶瑛曰。春之風自下而上。紙鳶因之。

以起夏之風橫行空中。故樹杪多風聲。秋之風自上而下。木葉因之以隕。冬之風著土而行。是以吼地而生寒。

虹霓入庭中

陰陽之氣和則為雨露。怒則為雷霆。淫則為虹霓。虹者攻也。陽攻陰也。蜺者齧也。災氣傷害于物。如有所齧也。蔡邕曰。見于日中。曲而青紅者曰虹。見于日旁。白而直者為蜺。易飛候曰。赤無胡者。蚩尤旗也。衡不屈者。天杵也。直下上不屈者。天栝也。成都志。韋皋鎮蜀。常與賓客宴郡西亭。暴風雨。俄頃而霽。虹蜺自空而下。直入庭。垂首于筵。吸其飲食。且盡。五色似霞。首似驢。四視左右。久而方去。公懼罷宴。曰。吾聞虹蜺者。妖殄之氣。今止吾宴。怪之甚矣。豆盧署曰。夫虹蜺。天使也。降于邪則為戾。降于正則為祥。公正人也。故以祥賀。旬日果有詔拜中書令。稽神錄。荊州有氣如虹。五采奪目。有首如驢。長數十丈。入廳事而行。三匝而滅。占者曰。廳事當有哭聲。然非府之咎。頃之順貞穆皇后崩。發哀于此堂。祥異參驗。唐元和二年三月。彩虹入潤州。大將張子良宅。初入漿水皆盡。又入井飲之。是年九月。李錡反。令子良收宣歙。子良反兵圍城。錡就擒。子良拜金吾。尋歷方鎮。晉陵薛願。虹飲其釜。輦酒灌之。遂吐金滿釜。以報。又

東甌后記。越王無諸舊宮中。斷虹飲于池。漸化為男子。入林中。隱隱如雷。化彩龍飛去。八朝窮怪錄。魏明帝正光二年。首陽山中。晚虹化為女子。帝逼幸之。作鍾鼓聲。復為虹去。溫湛婢。見老嫗流涕。無孔竅。抽刀逐之。化為紫虹。劉義慶方食粥。白虹飲其粥。義慶擲器于地。遂作風雨聲。振于庭。良久不見。前涼錄。張駿六年。有彩虹五重降。有如鍾鼓之聲。春秋潛潭巴虹五色。迭至。炤于宮殿。有兵革之事。感情符。九女並御。則九虹並見。春秋考異郵。虹蛻出。亂惑棄和。春秋演孔圖。霓者斗之亂精也。斗失度。則投霓見態。一曰填星之精。散為虹蛻。主內淫。主惑心。漢書。光和元年。黑氣墮北宮。溫明殿。黑如車蓋。五色有頭體。長十餘丈。形貌似龍。蔡邕曰。此所謂天投蛻者也。宋志。虹下宮殿園池井內。不出一年。其下君凶政亂。若數見。后黨盛。如從井中出。或飲井中水者。主兵起。國憂出地中。其地大饑。京房曰。赤虹見。萬人死。白虹亦然。抱朴子曰。赤虹見城中。其城必大戰流血。晉志曰。虹頭尾至地流血之象。甘氏曰。虹貫日。近臣為亂。諸侯有欲反者。赤黑虹尤甚。一曰。虹出入人家井中。其家則有兵傷。一曰。當出貴女。而后家受其殃。一曰。有兵。不則有盜賊相傷。虹霓。巨天后妃陰脅天子。赤虹從天直下。國亂無主。赤虹與日俱出。其野有急兵。白虹如杵。其下有兵。蛻因日而表。

黃內青者婦專君也。蛻在日旁。中天而直者。君有外通于臣也。白虹貫日。赤蛻四背。人君惑寵妾而棄正嫡。白虹奪日之先。尊卑不別。又曰。日中有白虹。沖日在東方。東反在西方。西反南北二方亦然。黃帝占白虹繞城。不匝。從虹缺處攻之。勝考之前志。黑虹入營。而宋輯卒。見述異記。白虹繞軍。而諸葛恪敗。見吳志。虹飲井水竭。而上官桀誅。見書。虹蛻彌天。而愍帝為劉聰所弑。見晉書。白虹貫東宮門。而太子勇廢。見北史。其為乖沴不和之象明矣。

雷神形狀

投荒雜錄。雷民圖。雷以祀者。皆豕首鱗身。山海經。雷澤有雷神。龍首人身。鼓其腹則雷。搜神記。晉扶風楊道和。夏于田中值雨。至桑樹下。霹靂下擊之。道和以鋤格折其股。遂落地。不得去。唇如丹。目如鏡。毛角長三寸餘。狀似六畜。頭似獼猴。唐代州西有大槐樹。震雷擊之。中裂數丈。雷為樹所夾。狂吼彌日。眾披靡不敢近。狄仁傑逼而問之。乃云。樹有乖龍。所繇令我逐之。落勢不堪。為樹所夾。仁傑乃命破樹。始得出。酉陽雜俎。貞元四年。宣州忽大雷雨。一物墜地。猪首。手足各兩指。執一赤蛇。嚙之。俄頃雲暗而失。時皆圖而得之。投荒雜錄。常有雷民。因大雷電空中。有物。豕首鱗身。狀甚異。

民揮刀以斬其物。踏地血流道中。而雷益厲。其夕凌空而去。自後揮刀居民。頻為天火所災。錄異記唐潤州延陵縣茅山界。元和春大風雨。隳一鬼身二丈餘。黑色而如猪首。角五六尺。肉翅丈餘。豹尾。服絳毼。豹皮纏腰。手足兩爪皆金色。執赤蛇。足踏之。瞪目欲食。其聲如雷。尋復雷雨翼之而去。宋大觀間。大滌山人胡真。隱居山間。一日忽聞有聲若鼙鼓。數百里雲霧間。火毬相逐。已而迅雷烈風。移時乃止。獐園載廣東人家風雨晦冥中。一雷神落地不得去。赤髮猙獰。狀如獸頭。似獼猴。角內翅青。手執綠玉斧。語其家急。延正一道士來誦清淨經。出我須臾。誦畢騰空而去。我太祖常在默坐。適前殿雷擊。恍惚見殿角有人長三尺。青膚肉翅。狀肖猴。兩目耿耿。有光向帝稽首。騰空而去。乃下詔曰。五雷著跡于殿庭。其減膳自省。廣異記開元末。雷州有雷公與鯨。鯨身出水上。雷公數十在空中。上下或縱火。或詬擊。七日方罷。海邊居人往看。不知誰勝。但見海水正赤。成化間。永州甯遠縣民家。婦方媿。有物自天際墮。產室中。高尺有五。藍色。鷹嘴龍爪。而膊下有肉翅。如蝙蝠狀。天地晦冥。風雨不止。巫者曰。此雷神也。或教以斷新傘藉之。仍疊十餘几。閣其上。日為清穢。數次。越三日。復大雷。電物乃飛去。唐李鄘介休縣民。送解牒。夜止晉祠宇下。聞人叩門曰。介休王借。

霹靂車收麥良久見持一物如幢扛上環綴旗幡凡十八葉每葉有光如電民至日據高阜候之介山有雲氣如空烟須臾風吼雷震壞麥千餘頃宋祥符中岳州玉真觀災惟留一柱有謝仙火三字倒書而刻之後有問何仙姑者曰謝仙者雷部中鬼也夫婦皆長三尺其色如玉掌行火于人間好以鐵筆書字元豐二年岳陽樓火土木碑碣俱燼惟此三字無損史傳載人有與雷鬪者齊葛丘訴為雷所擊三日三夜不能勝眇其左目高歡將薛孤延亦與霹靂鬪常遇雷火燒浮屠躍馬案稍大呼繞浮屠而走雷火遽滅廣異記唐歐陽紹任雷州長史館於城西前臨大池常出雲氣居者多死紹至別穿巨壑引決此水雷電大至火光燭地紹率其徒持弓排鏑與雷師戰衣並焦卷自辰至酉雷電飛散池亦涸竭中獲物如蠶長四五尺無頭目斫刺不傷洋鐵汁焦灼為粉而服之南人呼紹為忽雷傳奇海康陳鸞鳳鄉有雷公廟因大旱曰我之鄉乃雷鄉也為神不福焉用廟為秉炬蒸之其俗不得以黃魚彘肉相和食必震死鸞鳳以所忌物相和啖之俄有迅雷急雨鸞鳳以刀上揮中雷左股墮地狀類熊猪毛角肉翼青色手執石斧流血注然鸞鳳知雷無神欲斷其頸眾譁持之逡巡雷翼其傷者和斷股而去于是持刀行三十里過諸舅兄家又遭霆震火

焚其室。知無容身處。乃秉炬入于乳穴。嵌空之處。雷不能復震矣。三暝然後返舍。後遂為人祈雨。雷卒不能害。時人目為雨師。嶺表錄異。雷州之西雷公廟。百姓每歲配連鼓雷車。具酒食奠焉。每大雷雨後。于野中得黧石。謂之雷公墨。叩之鎗然。光瑩如漆。凡訟者投牒。必以雷墨。雖常墨書之為利。又霹靂處得楔如斧者。謂之霹靂楔。小兒佩帶。皆辟驚邪。孕婦催生有驗。

雷書十二字增

筆談。宋治平中。華亭縣雷震天王寺柱。上有倒書高洞揚雅一十六人。火令章凡十一字。德清縣志。覺海寺。宋時為雷所震。殿柱上有雷書十二字。曰。酉侯李約。火攸利。火謝均。思通。字大盈。尺入木三分。倒書于柱。

雷繪梅花

耳談。姑蘇一富人韓某。暑月坐堂中。忽暴雷起。繞柱奮擊。數刻始去。堂中砌石上繪梅花一枝。紋理精妍。猶圍萬歷年間。西洞庭翠峯寺。比丘維心。初構精廬。二楹四壁。新塗白堊。方念得畫師好手。繪之中夜霹靂一聲。雷神下來。為寫山川樹木人物屋宇。無不具備。明晨起視。燦然光明。宛是四幅梅道人水墨圖。神已不見矣。以上二事。

隱閣似誕崇禎丙子雷擊余邑市民王姓家雲雨晦冥震聲甚厲偶觸屋室雷電遂
霽階上有天書二子不孝他日重治八字體作行書徑二尺餘似以積沙成之而掃
漑不能去頃之自滅則萬目所共覩也稽神錄江西村中霆震一老婦為雷火所燒
一臂盡傷既而空中呼曰悞矣即墜一餅餅有藥如膏曰以此傳之即差如其言而
愈又有村人震死空中亦呼曰誤可取蚯蚓搗爛覆臍中當差如言傳之遂蘇此又
異于前事矣

